


S. AURELII AUGUSTINI

HIPPONENSIS EPISCOPI

DE ACTIS CUM FELICE MANICHÆO

Libri Duo ^(a).



LIBER PRIMUS.

ACTA PRIMÆ DIEI.

CAPUT PRIMUM. — Honorio Augusto sextum consule¹, septimo idus decembris, Augustinus episcopus Ecclesiae catholice Hippone regiensium regionum² dixit: Hesterno die scis te dixisse quod possis defendere scripturas Manichæi, et asserere quod veritatem habeant; si hoc placet tibi hodie facere, aut præsumis te posse, dic.

FELIX manichæus dixit: Ego me non nego dixisse defendere legem meam, si proferantur auctores legis meæ in medio.

Et cum Augustinus episcopus epistolam Manichæi, quam Fundamenti appellant, protulisset, dixit: Si legero ex hoc codice, quem me vides ferre, epistolam Manichæi quam Fundamenti appellatis, potes agnoscere an ipsa sit?

FEL. dixit: Agnoscō.

AUG. dixit: Accipe tu ipse, et lege.

Et cum accepisset codicem Felix, legit: *Manichæus apostolus Iesu Christi providentia Dei Patris. Hæc sunt salubria verba ex perenni ac vivo fonte, que qui audierit et fidelem primitus crediderit, deinde qua insinuata sunt custodierit, nunquam erit morti obnoxius, rerum æsterna et gloria vita fructur. Nam projecto bonitus est judicandus, qui hac divina instructus cognitione fuerit, per quam liberatus in sempiterna vita permanebit.*

AUG. episcopus dixit: Agnoristi certe epistolam Manichæi vestri?

FEL. dixit: Agnove.

AUG. dixit: Proba nobis ergo quomodo Manichæus iste sit apostolus Iesu Christi. Non enim eum in Evangelio inter Apostolos legimus aliquando: et quis fuerit ordinatus in locum Judæ traditoris, novimus, id est sanctus Matthias (Act. i, 26); et quis postea Dominus voce de cœlo vocatus sit, hoc est Paulus apostolus³ (Id. ix), omnes recognoscunt. Istum ergo Manichæum proba nobis apostolum esse Christi, quod in capite epistolarum suis ausus est ponere.

CAPUT II. — FEL. dixit: Et Sanctitas tua mihi

ADMONITIO PP. BENEDICTINORUM.

Acta cum Felice emendavimus ad Mass. Victorinum, Floriacensem, Casaleensem, ad varias lectiones trium Belgicorum, et ad editiones Am. et Fr. et Ven.

Comparavimus præterea eas omnes editiones initio Retr. et Confess., t. 1, memoratas. M.

¹ Editiones Am. et Fr., septies consule; reluctantibus omnibus Uss. et isthoc loco et in Retractionibus.

² Forte, Hippone regium.

³ Er. Lugd. et Ven., hic est Paulus apostolus. M.

probet quod in Evangelio scriptum est, Christo dilecente: *Vado ad Patrem; et mittam vobis Spiritum sanctum paracletum, qui vos inducat in omnem veritatem* (Joan. xvi, 13). Hoc tu mihi extra scripturam istam proba esse scripturam Spiritus sancti, quod Christus promisi ubi omnis veritas reperiatur: et si invenero veritatem in aliis codicibus qui ad Manichæum non pertinent, et Christus illos tradidit: sic enim dictum est a Christo, quia Spiritus sanctus paracletus ipse in omnem veritatem inducit: secundum Christi sermonem ego scripturas Manichæi recuso.

AUG. dixit: Quoniam ergo tu probare non potuisti, quomodo sit Manichæus apostolus Christi, et exigis ut ego probem quomodo miserit Spiritum sanctum paracletum quem promisit, ut tunc respucas scripturas Manichæi, si inveneris impletam promissionem Christi preter scripturas Manichæi: quamvis prior ad interrogata mea respondere debueris, tamen ecce prior ipse respondeo, et ostendo tibi quando missus sit Spiritus sanctus quem Christus promisit. Et accedit ad Evangelium et ad Actus Apostolorum.

CAPUT III. — Et cum accepisset codicem Evangelii, recitavit: *Dum autem hoc loquuntur, Jesus stetit in medio eorum, et dixit eis: Pas vobis; ego sum, nolite timere. Et cum legeret, dixit: Hoc post resurrectionem. Et cum dixisset, legit: Conturbati vero et conterriti existimabant se spiritum videre. Et dixit eis: Quid turbati estis, et cogitationes ascendunt in corda vestra? Videite manus meas et pedes meos, quia ego ipse sum: palpate, et videite, quia spiritus carnem et ossa non habet, sicut me videtis habere. Et cum hoc dixisset, ostendit eis manus et pedes. Adhuc autem illis non creditibus, et mirantibus præ gaudio, dixit: Habetis hic aliquid quod manducetur? At illi obtulerunt ei partem plicis assi et favum mellis. Et cum manducasset coram eis, sumens reliquias dedit eis, et dixit ad eos: Hæc sunt verba quæ locutus sum ad vos, cum adhuc essem vobis ac, quoniam necesse est impleri omnia quæ scripta sunt in lege Moysi, et Prophetis, et Psalmis de me.*

(a) Scripti anno Christi 404, die 7 et 12 decembris

Tunc aperuit illis sensum, ut intelligerent Scripturas: et dixit eis, Quoniam sic scriptum est, et sic oportebat Christum pati et resurgere a mortuis die tertio, et praedicari in nomine ejus prenientiam et remissionem peccatorum in omnes gentes, incipientibus ab Jerusalem Vos autem estis testes horum. Et ego mittam promissum Patris mei in vos: vos autem sedete in civitate quoadusque induamini virtutem ex alto (Luc. xxiv, 36-49). Et cum reddidisset codicem Evangelii, accepit Actus Apostolorum, et dixit: Audivimus in Evangelio commenorassemus Evangelistam sanctum promissionem Christi, quae est in Evangelio secundum Joannem, quem præsens Felix commemoravit. Ubi enim dixit Dominus, *Mitto vobis Spiritum sanctum paracletum* (Joan. xvi, 7), Joannes evangelista scripsit. Hoc autem quod modo legi, Lucas evangelista attestatus est, et consonuit veritati apostoli Joannis. Videamus etiam quomodo perfectum est quod promisit Dominus, et quomodo impletum: ut cum fuerit ex canonis Libris sanctæ Ecclesiæ expressa impletio promissionis Domini, paracletum Spiritum sanctum alterum non quereramus, ne in seductorum laqueos incurramus.

CAPUT IV.—Et recitavit ex Actibus Apostolorum: Primum quidem sermonem feci de omnibus, o Theophile, quæ cœpit Jesus faceret et docere, in die quo Apostolos elegit per Spiritum sanctum, et præcepit prædicare Evangelium: quibus præbuit se vivum post passionem in multis argumentis dierum, visus eis dies quadraginta, et docens de regno Dei, et quomodo conservatus est cum illis. Et præcepit eis ne discederent ab Jerosolymis, sed sustinerent pollicitationem Patris, quam audistis, inquit, ex ore meo; quoniam Joannes quidem baptizari aqua, vos autem Spiritu sancto incipiatis baptizari, quem et accepturi estis non post multos istos dies, usque ad Pentecosten. Illi ergo convenientes, interrogabant eum dicentes: Domine, si in hoc tempore præsentabis regnum Israel? Ille autem dixit: Nemo potest cognoscere tempus, quod Pater posuit in sua potestate; sed accipietis virtutem Spiritus sancti supercendentem in vos, et eritis mihi testes apud Jerosolymam, et in tota Judæa et Samaria, et usque in totam terram. Cum hæc diceret, nubes suscepit eum, et sublatus est ab eis. Et quomodo contemplantes erant cum iret in cælum, ecce duo viri adstabant illis in ueste alba, qui dixerunt ad eos: Viri Galilæi, quid statis respicientes in cælum? Iste Jesus qui assumpsus est in cælum a vobis, sic veniet quemadmodum vidistis eum euntem in cælum. Tunc reversi sunt Jerosolymam a monte qui vocatur Elæon, qui est juxta Jerosolymam, sabbati habens iter. Et cum introissent, ascenderunt in superiora, ubi habitabant Petrus et Joannes, Jacobus et Andreas, Philippus et Thomas, Bartholomæus et Matthæus, Jacobus Alphæi, et Simon Zelotes, et Judas Jacobi. Ei erant perseverantes omnes unanimes in orationibus, cum mulieribus, et Maria quæ fuerat mater Jesu, et fratribus ejus. Et in diebus illis exsurrexit Petrus in medio dissentium¹, et dixit (fuit autem turba in uno, hominum quasi centum

tiginti): Viri fratres, oportet adimpleri scripturam istam, quam prædicti Spiritus sanctus ore sancti David de Juda, qui fuit deductor illorum qui comprehenderunt Jesum, quoniam annumeratus erat inter nos, qui habuit sortem hujus ministerii. Hic ergo possedit agrum de mercede iniustitiae suæ, et collum sibi alligavit, et dejectus in faciem, disruptus est medius, et effusa sunt omnia viscera ejus. Quod et cognitum factum est omnibus qui inhabitat Jerosolymam, ita ut vocaretur ager ille ipsorum lingua Acedemach, id est, ager sanguinis. Scriptum est enim in libro Psalmorum: Fiat villa ejus deserta, et non sit qui inhabitet in ea, et episcopatum ejus accipiat alter. Oportet itaque ex his viris qui conveniunt nobiscum in omni tempore quo introivit super nos² et excessit Dominus Jesus Christus, incipiens a baptismo Joannis usque in illum diem quo assumptus est a nobis, testem resurrectionis ejus nobiscum esse. Et statuit duos, Joseph qui vocabatur Barsabas, qui et Iustus, et Matthæus. Et precatus dixit: Tu, Domine, cordum omnium intellector, ostende ex his duobus quem elegisti ad suscipiendum locum hujus ministerij et annuntiationis, a qua excessit Judas ambulare in locum suum. Et dederunt sortes suas³, et cecidit sortes super Matthæum, et simul deputatus est cum undecim Apostolis duodecimus. Et cum legisset, dixit: Audivimus quis ordinatus est in locum Judæ traditoris, quod paulo ante commemoravi, ne quisquam per fraudem irrepatur in Apostolorum numerum, et nomine apostolatus fallat ignarus.

CAPUT V.—Nunc videamus quod promisimus, quomodo impleta sit Christi promissio de Spiritu sancto. Et cum dixisset, legit in loco: Tempore quo supplicatus est dies Pentecostes, fuerunt omnes simul in uno. Et factus est subito sonus de cælo, quasi ferretrum flatus vehemens, et implevit totam illam domum, in qua erant sedentes. Et visæ sunt illis linguae divisæ quasi ignis, qui et insedit super unumquemque eorum. Et impleti sunt omnes Spiritu sancto, et cœperunt loqui variis linguis, quomodo Spiritus dabit eis pronuntiare. Jerosolymis autem fuerunt habitatores Judæi, homines ex omnib[us] natione quæ est sub cælo. Et cum facta esset vox, collecta est turba et confusa, quoniam audiebat unusquisque suo sermone et suis linguis loquentes eos. Stupabant autem et admirabantur, ad invicem dicentes: Nonne omnes qui loquuntur, natione sunt Galilæi? Et quomodo agnoscimus in illis sermonem in quo nati sumus? Parti, et Medi, et Elampiæ, et qui habitant Mesopotamiam, Judæam et Cappadociam⁴, Pontum et Asiam, Phrygiæ et Pamphyliam, Egyptum et partes Libyæ quæ est circa Cyrenen, et qui advenierant Romani, Judæique et Proselyti, Cretenses et Arabes, audiebant loquentes illos suis linguis magnalia Dei (Act. viii, 11). Et cum recitaret, dixit: Audisti nunc jam Spiritum sanctum, quomodo sit missus? Quod a me

¹ Editi, inter nos. At MSS., super nos. Juxta Græcum, eph' mās.

² Addidimus, suas, ex MSS. In græco est, autem.

³ Editi serebant, armeniam et Cappadociam finienduntur ex MSS., qui isthuc græco et latino textui vulgatae consenserunt.

(Dix-sept.)

¹ Editi, in medio fratrum. At MSS., dissentium. Græce est, φασιλέων.

SANCT. AUGUST. VIII.

exegisti probavi; superest ut et tu facias quod promisisti: quoniam invenimus quando misit Spiritum sanctum, quem promisit; respuas illam scripturam, quæ sub nomine Spiritus sancti fraudare voluit vel lectorem vel auditorem.

CAPUT VI. — FEL. dixit: Ego non nego id quod dixi, quia cum probatum mihi fuerit quod Spiritus sanctus docuerit veritatem quam quero, illam respuo. Hoc enim Sanctitas tua mihi legit, ubi Spiritum sanctum Apostoli acceperunt, et in ipsis Apostolis unum quero qui me doceat de initio, de medio, et de fine.

AUC. dixit: Si legeris hoc dixisse Dominum, Mitto vobis Spiritum sanctum, qui doceat vos initium, medium et finem; bene me astringis ut ostendam quos docuerit Spiritus sanctus.

FEL. dixit: Quia sanctitas tua hoc dicit, quod Apostoli ipsi acceperunt Spiritum sanctum paracletum; iterum dico, de Apostolis ipsis quem volueris, doceat me quod me Manichæus docuit, aut ipsius doctrinam evacuet de duodecim quem volueris.

AUC. dixit: Absit longe a fide Apostolorum¹, ut doctrinam doceant sacrilegi Manichæi. Sed quoniam dicis unum ipsorum debere evacuare doctrinam Manichæi, modo autem sancti Apostoli nou sunt in corpore; ego minimus, non solum omnium Apostolorum, sed omnium episcoporum, (nam ad merita Apostolorum quando aspiro?) quantum mihi Dominus de ipso Spiritu suo largiri dignatus est, evacuo doctrinam Manichæi, cum cooperint legi sequentia illius epistole, quam tu ipse Manichæi e se non negas.

FEL. dixit: Dixisti quia Apostoli de corpore recesserunt, scripturæ eorum valent usque nunc: et quia dixit Sanctitas tua, et quia dedisti potestatem dicendi quæ voluerimus sine ulla formidine, dixisti, Evacuo legem Manichæi: et ego dico, *Onnis homo mendax, sotus Deus verax* (*Psal. cxv, 2; Rom. iii, 4;*) Scripturæ Dei loquuntur.

CAPUT VII.— AUC. dixit: Tu quidem et homo es, et sicut res ipsa modo indicatura est, mendax. Et quoniam locutus es quæ voluisti, non de Scriptura Dei; nō potest et me loqui quod volo. Si enim veritas est Manichæi tui, nec a me destrui poterit: si falsitas est, quid interest a quo destruatur? Tamen quia de Apostolorum scriptura dixisti, quod etsi illi non sint in cor, ore, sunt hic scripturæ eorum: ante assumpti sunt Apostoli, quam error Manichæi natus in mundo fuerat; propterea non inveniuntur scripturæ Apostolorum evidenter contra Manichæum disserentes. Verumtamen quod apostolus Paulus in Spiritu isto sancto paracleto quem acceperat, futurum previderit de talibus, qualis Manichæus fuit, quales eritis et vos, recito ut agnoscas. Et accepta Epistola apostoli Pauli ad Timotheum legit: *Spiritus autem manifeste dicit quia in novissimis temporibus re-*

cedent quidam a fide, attendentes spiritibus seductoribus, doctrinis dæmoniorum in hypocrisi mendacioquorum, cauteriatam habentes conscientiam suam; prohibentes nubere, abstinere a cibis quos Deus creavit ad percipiendum cum gratiarum actione fidelibus, et tis qui cognoverunt veritatem: quia omnis creatura Dei bona est, et nihil abiciendum quod cum gratiarum actione percipitur; sanctificatur enim per verbum Dei et orationem. Hæc præcipiens fratribus, bonus eris minister Iesu Christi (I Tim. iv, 4-6). Et cum legeret, dixit: Ego hoc de vobis, et de talibus qui dicunt aliquam creaturam Dei immundam esse, et qui dicunt omnem concubitum et qui sit cum uxore, fornicationem esse: hoc est enim quod ait, Prohibentes nuptias; per Spiritum prophetice designatum et expressum esse dico. Tu autem si negas omnem concubitum fornicationem esse, aut si dicis omnem cibum humanum licitum et ad edendum concessum hominibus, mundum esse, non es de illis quos prophetavit Apostolus. Si autem inveniris in iis quæ dixi, ecce habes apostolum Paulum destruentem et evanquenter doctrinam Manichæi futuri. Itaque responde ad id quod interrogavi: Omnis concubitus fornicatio est, an concubitus cum uxore non est peccatum?

CAPUT VIII. — FEL. dixit: Iterum mibi recitetur quod dixit Apostolus. Et recitatum est: *Spiritus autem manifeste dicit*, et cetera quæ supra sunt. FEL. dixit: Manichæus non a fide recessit, sicut dicit Paulus, sicut ceteri recesserunt a fide quasi in sectam suam: Manichæus autem a nulla secta recessit, ut dicitur quia a fide recessit.

AUC. dixit: Quoniam te video nolle respondere ad quod interrogaris, ne inveniaris vel non tenere Spiritum sanctum, quem jam probavimus missum esse Apostolis, vel non esse in corum numero quos futuros Paulus designavit, ubi et vos ipsos prophetavit; breviter respondeo: Ut secundum tuum intellectum accipiam quod dixisti, Recedent a fide: quia non recedunt a fide, nisi illi qui fuerunt in aliqua fide; Manichæus autem in nulla fide fuit a qua recesserit, sed in qua fuit in ea permanens: hoc te interrogo, utrum Manichæus, vel potius doctrina dæmoniorum mendacioquorum quæ fuit in Manichæo, nullos Christianos catholicos seduxerit, ut recederent a fide. Si enim multi a vobis, et per vos, et per illam doctrinam seducuntur, ut recedant a fide, et intendant spiritibus seductoribus, qualis in Manichæo fuit; et incipient dicere omnem concubitum esse fornicationem, unde Apostolus dicit, *Prohibentes nuptias*; et incipient dicere, carnes quas comedunt homines, non esse Dei creaturam, sed dæmonum facturam, et esse immunitudinem, manifestum est de his prædictis Spiritum sanctum paracletum qui erat in apostolo Paulo, quod recessuri erant a fide, intendentis spiritibus seductoribus, qualis fuit in Manichæo. Jam ergo quia ego respondi, justum est ut tu respondeas ad quod interrogavi, utrum non dicas omnem concubitum esse fornicationem: aut si ad hoc non vis respondere, ad id quod primo interrogavi responde, ut probes Mani-

¹ vox, apostolorum, abest a manuscripto.

chæum esse apostolum Christi : aut si et hoc non vis , permitte me evanescere doctrinam ipsius , quod promisi cum legeretur epistola ejus, quam dicitis Fundamenta.

CAPUT IX. — FEL. dixit : Ego respondeo ad id quod dicit Sanctitas tua, quia in Paulo venit Spiritus sanctus paracletus.

AUG. dixit : Non in solo.

FEL. dixit : Ego de ipso agem : quia si in ipso¹, et in omnes. Et si in ipso : Paulus enim in altera Epistola dicit : *Ex parte scimus, et ex parte prophetamus : cum venerit autem quod perfectum est, abolebuntur ea quæ ex parte dicta sunt* (I Cor. xiii, 9, 10). Nos audientes Paulum hoc dicere, venit Manichæus cum prædicatione sua, et suscepimus eum secundum quod Christus dixit, *Mitto vobis Spiritum sanctum* (Joan. xvi, 7). Et Paulus venit et dixit quia et ipse venturus est, et postea nemo venit ; ideo suscepimus Manichæum. Et quia venit Manichæus, et per suam prædicationem docuit nos initium, medium et finem : docuit nos de fabrica mundi, quare facta est, et unde facta est, et qui fecerunt; docuit nos quare dies et quare nox ; docuit nos de cursu solis et lunæ : quia hoc in Paulo non audivimus, nec in cæterorum Apostolorum scripturis : hoc credimus, quia ipse est Paracletus. Itaque illud iterum dico, quod superius dixi : si audieris in altera scriptura, ubi Paracletus loquitur, id est, Spiritus sanctus, de quo volueris interrogare, et docueris me; credo et renunio.

CAPUT X. — AUG. dixit : Dicis te ideo non credere Spiritum sanctum paracletum in Paulo apostolo fuisse, quia Paulus dicit, *Ex parte enim scimus, et ex parte prophetamus* : et inde putas Apostolum per haec verba prædictissime velut alium venturum post se, qui prædicaret omnia quæ ipse non potuit, quia ex parte dicebat ; et hunc tu credis esse Manichæum. Primo ergo, ex ipsa lectione Apostoli ostendo unde dicebat hoc Apostolus. Deinde, quia dixisti quod Manichæus vos docuerit initium, medium et finem, et quomodo vel quare factus sit mundus, de cursu solis et lunæ, et de aliis quæ commemorasti ; non legitur in Evangelio Dominum dixisse, *Mitto vobis Paracletum qui vos doceat de cursu solis et lunæ*. Christianos enim facere volebat, non mathematicos. Sufficit autem ut homines de his rebus, quantum in schola didicerunt, noverint propter humanaos usus. Christus autem venturum Paracletum dixit, qui inducat in omnem veritatem : sed non ibi ait, *Initium, medium et finem* ; non ait, *Solis et lunæ cursus*. Aut si putas hanc doctrinam ad illam veritatem pertinere, quam per Spiritum sanctum Christus promisit, interrogo te quot sint stellæ. Si acceperisti Spiritum illum, de quo dicas, ad quem pertinet docere ista, quæ ego dico ad disciplinam et doctrinam christianam non pertinere ; oportet ut renunties et respondeas mihi. Debitorem enim te fecisti, ut si quid de talibus interrogavero, si non responderis, non in te appareat Spiritus ille, de quo dictum est, *Inducet in omnem veritatem* (Joan. xvi, 13) :

¹ MSS., *quæ et in ipso*.

si illa est veritas quo ista pertinent. Itaque elige tibi utrum velis et paratus sis mihi de his rebus respondere, tanquam homo qui acceperisti Spiritum qui introducit in omnem veritatem, et dicas quia ad ipsam veritatem pertinet scire ista mundana. Itaque ego tibi possum ea dicere quæ pertinent ad doctrinam christianam : tu autem qui putas ad eam pertinere quomodo sit factus mundus, et quæ agantur in mundo, ad omnia mihi necesse est respondeas. Sed plane cum responderis, probatur es. Sed antequam incipias dicere, si forte habes quod ille confinxerit, quem secutus es, doceam ego prius quod promisi, unde dicebat Apostolus, *Ex parte scimus, et ex parte prophetamus*.

CAPUT XI. — Dicebat enim, sicut lectio ipsa mox indicatura est, quia in ista vita homo cum est, non potest assequi omnia; sed ex parte assequitur in hac vita : ipse autem Spiritus sanctus, qui ex parte docet in hac vita, post hanc vitam introducet in omnem veritatem. Quod ut apertissime doceatur, audi Apostolum. Et cum diceret, ex Apostolo legit : *Sive autem prophetie evanescuntur, sive linguae cessabunt, sive scientia evanescuntur : ex parte enim scimus, et ex parte prophetamus*; cum autem venerit quod perfectum est, quod ex parte est evanescit. Cum esset parvulus, loquebar ut parvulus, sapiebam quasi parvulus, cogitabam quasi parvulus : cum autem factus sum vir, evanesci ea quæ parvuli erant. Videmus enim nunc per speculum in enigmate, tunc autem facie ad faciem (I Cor. xiii, 8-12).

Et cum legeret, dixit : Jam dic mihi tu, si tempora futura Manichæi prædictebat Apostolus, ultrum tu viideas modo Deum facie ad faciem.

CAPUT XII. — FEL. dixit : Non tantum ego possum contra tuam virtutem, quia mira virtus est gradus episcopalis ; deinde contra leges Imperatorum : et superius petivi compendie¹ ut doceas me quid est veritas ; et si docueris me quid est veritas, patet quod teneo mendacium esse.

AUG. dixit : Apparuit te probare non potuisse apostolum Christi esse Manichæum : quare autem non potueris, breviter expono. Dixisti inde te probore Manichæum esse apostolum Christi, quia paracletum venturum promisit Christus Spiritum sanctum : et quia non invenires quando venerit quem Christus promisit, hinc te credere ipsum esse Manichæum. At vero ubi probavi per Scripturas sanctas, ecclesiasticas, canonicas, quando venerit apertissime Spiritus sanctus, quem venturum promisit Dominus Christus, convertisti te, ut dices, debere tibi ostendi quid docuerit, et utrum Manichæi doctrinam evanescerit. Cum ergo respondissem Manichæum post Apostolos fuisse in carne ; illorum autem doctrinam, antequam Manichæus natus esset, ab ipsis fuisse prædicatum : dixi tamen unum ipsorum Apostolorum Paulum per Spiritum sanctum, qui in omnes Apostolos venerat, prophetasse etiam de ista vestra doctrina, quia futura erat, et eam appellasse doctrinam dæmoniorum manadiloquorum ; ubi ostendi ea, quæ dixit Paulus fu-

¹ Ling. et Ven., *contentive*. M.

lura in ipsa doctrina, ad vestram professionem pertinere, id est, prohibitionem nuptiarum; quia omnem concupitum, et cum uxore, fornicationem esse dicitis: et abstinentiam a cibis quos Deus creavit; quia novi vos quosdam cibos dicere immundos, cum ipso sequatur et dicat, *Omnis creatura Dei bona est* (I Tim. iv, 4-4). Cum hic a te exigere ut responderes, dixisti Manichæum vos docere initium, medium et finem, et cursum solis et lunæ, et cætera talia, quæ cum ego ostenderem ad christianam doctrinam non pertinere; respondisti apostolum ipsum Paulum dixisse, quia ex parte scit et ex parte prophetat. Dixi vos non posse scire divina, cum sumus in hac vita; et hic videre per speculum et in ænigmate, tunc autem facie ad faciem: et quæsivi a te, si hoc putas dixisse apostolum Paulum, quod venturus esset Manichæus, qui doceret quod non poterat Paulus, pertinere ad te, qui te dicas accepisse ipsum Spiritum, videre modo Deum facie ad faciem. Qued quia non potes, manifestum est apostolum Paulum de illa vita dixisse, de qua dicit et Joannes: *Dilectissimi, filii Dei sumus, et nondum apparuit quid erimus: scimus autem quia cum apparuerit, similes ei erimus: quoniam videbimus eum sicuti est* (I Joau. iii, 3). Hoc tu cum audisses, dixisti te non valere contra meam virtutem: que virtus mea non est, sed si aliqua est, ab illo in hi data est ad redarguendos errores, qui virtus est omnium fidelium suorum, et pleno corde de se presumptum. Dixisti etiam quod te episcopalis terreatuctoritas: cum videoas quanta pace inter nos agamus, quanta tranquillitate disputemus; quemadmodum populus præsens nullam tibi vim faciat, nullum terrorem inquietat, sed tranquillissimus audiatur, sicut docet Christianos. Dixisti etiam timere te leges Imperatorum: hoc pro vera fide non timeret, quicm Spiritus sanctus impleret: nam et Petrus apostolus in passione Domini timuit, et ter negavit; ubi autem eum paracletus, quem Christus promiserat, Spiritus sanctus implevit, pro fide Domini crucifixus est; et ille qui primo habuit negationem timoris, postea impedit gloriosissimam passionem confessionis. Tu itaque ex hoc ipso quod timere te dixisti leges Imperatorum, quanvis et de cæteris rebus, satis appetet, quod non inveneris Spiritum paracletum veritatis: quia et si non timeres, aliis rebus convincereris.

FEL. dixit: Et Apostoli timuerunt.

AUG. dixit: Timuerunt ut caverent, non ut fidem suam comprehensi edicere dubitarent. Tu autem jam hinc timere debuisti, ut non hic te inveniremus: jam in medio es; quare times, nisi quia quod dicas non habes? Nam et si Imperatores timuissent, ante tacuisse. Nunc vero cum besterno die libellum Curatori dederis, et publice clamitaveris, cum codicibus tuis te paratum esse incendi, si aliquid malum in ipsis fuerit inventum; unde heri leges flagitabas quasi fortis, hodie veritatem fugis ut timidus.

CAPUT XIII. — FEL. dixit: Non veritatem fugio.

AUG. dixit: Dic ergo, si video Domum facie ad faciem, secundum pollicitationem tuam; quia dixisti

apostolum Paulum de vobis dixisse quia tam plenam veritatem acceptari essetis: ut intelligamus, vel credamus, Apostolum habuisse ex parte, et te totum.

FEL. dixit: Non veritatem fugio, sed veritatem quero. Quod tu dicas, quia non teneo, probetur mihi per Scripturas deisticas: hoc quero jam.

AUG. dixit: Prius profitere te non potuisse probare Manichæum apostolum Jesu Christi: et quantum potuero, cum omnia extirpata faecis contraria de corde tuo per ministerium meum, donante Domino, inserui tibi quæ acit¹ scientia veritatis, quæ perducat ad Deum, initians a fide.

FEL. dixit: Quia hoc dicas tu, ut legem meam negem, et accipiam alteram, meliorem duotaxat, quod quero ego; non hoc respondeo, ut legem meam negem antequam alteram accipiam.

AUG. dixit: Sed prius de vase funditur quod adversum habet, et sic impletor quod bonum est: aut si adhuc dubitas fundere, defende quo plenus es. Ostendam enim tibi, quantum me Dominus adjuvat, quanta immunditia et blasphemias plena sit doctrina Manichæi, si permittas ut legatur illa epistola, de cujus initio jam tractavimus, et non potuisse probare apostolum Christi esse Manichæum: sed ideo moras innectis, ne cætera legantur, ubi aperte vestra sacrilegia deprehenduntur; aut si permittis, legantur.

FEL. dixit: Permitto; quia dixisti omnia immunda fundi, et sic bona immitti: hoc enim dictum est Scientiæ tuæ. Ad quod et ego dico: Nullas aquam fundit, nisi alter impleverit.

AUG. dixit: Hoc video quam inconsiderate dixeris, ut mitius loquar, et non dicam insane. Utique de vase tibi similitudinem posui: in vas plenum nemo potest aliquid mittere, nisi fundatur illo quo plenum erat.

FEL. dixit: Unum dixisti, et ego dixi duo.

AUG. dixit: Si duo vasa dixisti, vis illum parem tuum fundimus et implemus illum (a), ut possis tu fundere quod habes?

FEL. dixit: Ambo unam aquam habemus.

AUG. dixit: Cum ergo ambo pleni sitis aqua vestra, quid implebimus, ut doceamus vos, nisi aliquis vestrum fuderit quod habet? Aut si bonum est, et ideo debet teneri ut defendatur et legatur illa epistola, videamus si vel cætera possunt defendi, si in ipso initio defecisti: aut si dicas te in illo non defecisse, proba nobis quomodo Manichæus sit apostolus Christi.

CAPUT XIV. — FEL. dixit: Christus dixit, Spiritum sanctum missurum se, qui in omnem veritatem inducat.

AUG. dixit: Si habes illum, attende ad id quod te jamdudum interrogavi. Dixisti enim ad ipsius doctrinam pertinere, etiam ista mundana cognoscere: dic mihi quæ sunt stellæ, si introductus es in istam omnem veritatem.

¹ Er. Lugd. et Ven., *Infero* tibi quæ sit. Lov., *Infero* tibi quæ sit. N.

(a) Illum forte Felicus parem vocat Cresconium, cuius verba retulimus supra, in Admonitione hisco Actis præfixa

FEL. dixit : Et ego dico, quia si Paracletus per Apostulos locutus est, et per Paulum : et ego peto Sanctitatem tuam, ut illa mihi ostendas quae jam dixi.

AUC. dixit : Confidere te non potuisse ostendere quod ego interrogavi, et ostendam secundum Scripturas quod pertineat ad fidem christianam.

FEL. dixit : Et ego, si mihi attuleris scripturas Manichaei, quinque auctores quos tibi dixi, quidquid me interrogavet, probo tibi.

AUC. dixit : De ipsis quinque auctoribus est ista epistola, cuius aperius principium, et invenimus ibi scriptum, *Manichaeus apostolus Iesu Christi* : et video quia ipsum principium non mihi exponis, quia non probas quomodo Manichaeus sit apostolus Jesu Christi.

FEL. dixit : Si in ista ¹ non probo, in secundo probo.

AUC. dixit : In quo secundo ?

FEL. dixit : In Thesauro.

AUC. dixit : Thesaurum istum, quem ideo tali nomine appellatis, ut miseris seducatis, quis scripsit ? Manichaeus ? Nolo mihi ab illo probes : quia ille Manichaeus mentitur, dicendo se esse quod non est ².

FEL. dixit : Tu proba mihi per alterum.

AUC. dixit : Quid vis tibi probem ?

FEL. dixit : Quia mentitur Manichaeus.

AUC. dixit : Quia tu non potes probare verum dicere Manichaeum, oportet ut ego probem mentitum esse Manichaeum ?

FEL. dixit : Quare non potui probare ? Numquid prolatae sunt scripture quas ego petivi, et non probavi ?

AUC. dixit : Sed scripturas Manichaei petitis, quibus fidem non habemus : aliunde proba. Ego autem de ipsa scriptura Manichaei tibi probo mentitum esse Manichaeum, et blasphemasse Manichaeum.

FEL. dixit : Afferantur libri.

AUC. dixit : Praesens est epistola Manichaei, quam dicitis Fundamenti. Initium in ædificio nullum est, nisi fundamentum : si eum ostendero in ipso fundamento ruinam fecisse, ceteram ejus constructionem utquid querimus ?

CAPUT XV. — FEL. dixit : Illoc dicas, in ipsa ostendens ruinam esse ³ : et ego dico, da arbitros quantos et tu habes, et tibi probo quia non mentitur.

AUC. dixit : Absit a nobis et a genere humano ut quantos hic vides, tantos videas Manichaeos.

FEL. dixit : Da, dixi, quæ a te petivi.

AUC. dixit : Quæ vis ergo ut dem tibi ?

FEL. dixit : Quos tu volueris.

AUC. dixit : Ego istos do ; si habes meliores, pete.

¹ Lov., si in isto. Ceteri libri, si in ista : subaudi, epistola Fundamenti.

² Fr. Lugd. et Ven. sic exhibent hunc locum: AUC. dixit : Thesaurum istum quem ideo tali nomine appellatis, ut miseris seducatis, quis scripsit ? FEL. dixit : Manichaeus... AUC. dixit : Nolo mihi ab illo probes, quia Manichaeus mentitur dicendo se esse quod non est. ⁴

³ Sic MSS. At editi, ostende in ipsa ruinam esse.

FEL. dixit : Quomodo istos das ?

AUC. dixit : Praesentes qui nos audiunt.

FEL. dixit : Ipsi mihi non favent.

AUC. dixit : Ergo tu tales queris qui tibi favent, non qui veritati ?

FEL. dixit : Qui me audiant, et non tantum me, sed et ipsam scripturam, ut probetur au verum dicit, an mentitur.

AUC. dixit : Vides ergo quia audirent. Legamus cetera : quia tu istem epistolam Manichaei esse confesses es.

FEL. dixit : Non nego.

AUC. dixit : Ergo legatur.

CAPUT XVI. — FEL. dixit : Arbitros non habeo. Et adjicit : Legatur caput illius. Et cum legeretur, et ventum esset ad locum ubi scriptum habet eadem epistola, *Pax Dei invicibilis et veritatis notitia sit cum fratribus suis et charissimis, qui mandatis cœlestibus credunt pariter atque deserviunt : sed et dextera luminis tueatur et eripiat vos ab omni incursione maligna, et a laqueo mundi ; pietas vero Spiritus sancti intima vestri pectoris adaptari, ut ipsis oculis videatis vestras animas*; Felix dixit : Da scripturam quæ ista redarguat.

AUC. dixit : Adhuc nihil mali audivimus, nisi quod ausus est Manichaeus apostolum Christi se nominare. Nam ea quæ dixit, adhuc ad tectorium fallacie pertinet, et ad ovinam pellem, quibus eis prius dicit verba bona, ut possit introducere mala. Sed quid volit per hæc verba introducere, videamus. Si enim aliquid mali introduxerit, et ista verba mala erunt et seductoria : si autem aliquid boni in posterioribus et veri dixerit, necessitate comprehendemus ⁵. Permitte ergo legantur sequentia.

FEL. dixit : Si ergo asseris quia in primo bona ponuntur, et postea mala immittuntur, quomodo ego tibi possum credere, cum mibi primo bona dixeris ?

AUC. dixit : Ego adhuc ista nec bona dixi, nec mala. Nihil mali adhuc audivimus, dixi : non dixi. Jam aliquid boni audivimus. Malum enim illud solum dixi, quod ausus est dicere se apostolum Christi. Verba vero quæ dixit in consequentibus, tunc erunt mala, si mali aliquid introduxerint; tunc erunt bona, si boni aliquid introduxerint. Permitte ergo ut sequentia legantur : quare times ?

FEL. dixit : Non timeo.

AUC. dixit : Permitte ergo ut legantur.

FEL. dixit : Legantur.

CAPUT XVII. — Et cum legeretur, et ventum esset ad locum ubi scriptum habet, Ita videntur fundata sunt ejusdem splendidissima regna supra lucidam et beatam terram, ut a nullo unquam aut moveri aut concuti possint ; Augustinus dixit : Terram istam quæ dicit, unde habebat ? Fech eam, an genuit eam, an æqualis et coæterna illi erat ? Istam dico terram lucidam et beatam quam dicit.

⁴ In MSS., reprehendimus.

FEL. dixit : Quomodo scriptum est, *In principio fecit Deus cælum et terram, et terra erat invisibilis et coquinabilis et incomposita?* Ego ita intelligo : In principio fecit Deus cælum et terram, et terra erat : quasi duæ terræ mihi videntur esse, secundum quod Manichæus dicit duo regna.

AUC. dixit : Quia Scripturam commemorasti nostram, quam soletis blasphemare, ad me pertinet exponere illam, et ostendere tibi, sine blasphemia esse illud scriptum, et cum veritate et non secundum Manichæum ; ut deinde tu vel in secundis mihi respondeas quod interrogavi.

FEL. dixit : Respondeo.

AUC. dixit : Quod scriptum est, *In principio fecit Deus cælum et terram;* breviter complexa est Scriptura quid fecerit Deus. Deinde quia nondum apparebat hæc terra quam fecerat, antequam eam distingueret et ornaret, qualem terram fecerat Deus, secula Scriptura exposuit, qualis terra erat de qua dixerat, *In principio fecit Deus cælum et terram :* tanquam cum audiissemus, *In principio fecit Deus cælum et terram,* quicquidem, quam terram, subjecit et ait, *Terra auctem, id est, illa quam fecerat Deus, invisibilis erat et incomposita* (*Gen. 1, 1, 2*). Non ergo duas terras dixit, sed qualia illa sicut expositum. Tu itaque responde nunc mihi quod breviter interrogavi : Terra ista lucida et beata quam dicit Manichæus, supra quam fundata erant regna Dei, ab ipso Deo facta erat, an generata de illo erat, an coæterna illi erat ? Unum de tribus, nisi molestum est, sine tergiversatione responde.

FEL. dixit : Ipse se scriptura interpretatur.

AUC. dixit : Si ergo nosti esse hic aliquem locum, ubi hoc dicat scriptura, quia illam terram vel genuit Deus, vel fecit, vel coæterna illi erat, aperi ad locum quem nosti, et lege mihi.

FEL. dixit : Non est in ista scriptura, sed in altera.

AUC. dixit : Credo ergo, quia si qua est illa scriptura, meministi quid ibi dixerit. Itaque tu mihi responde, qui nosti illam scripturam : et si dixeris quia non sic habet, convinces me. Si autem sic cognovero, secundum hoc disputo quod tu ipse responderis. Dic ergo an fecerit terram istam Deus, an genuerit, an coæterna illi fuerit : qui legisti in nescio quo libro, ubi esse hoc scriptum dicis.

FEL. dixit : Quia modo Sanctitas tua interpretata est Scripturam tuam, quomodo voluisti et acceptavi, et tu sic mihi accepta quidquid dixeris.

AUC. dixit : Interim quod interrogavi, si nihil me contra moverit accepto : si autem aliquid moverit, motum meum indico tibi, ut ad ipsum respondeas.

FEL. dixit : Ego non respondi ad tua dicta.

AUC. dixit : Quia prius est ut mihi ad id quod interrogavi respondeas, tamen feci etiam ut tibi prior responderem : forte non te movit, ideo non responderis, forte et me non movebit, cum responderis. Responde ergo ad quod interrogavi.

CAPUT XVIII. — FEL. dixit : Respondeo. Et adjectit : Dixisti ergo de terra illa in qua Deus habitat, an facta est ab illo, an generavit illam, an coæterna illi est. Et ego dico, quia quomodo Deus æternus est, et factura apud illum nulla est, totum æternum est.

AUC. dixit : Non illam ergo genuit, neque fecit ?

FEL. dixit : Non, sed est illi coæterna.

AUC. dixit : Si autem genuisset illam, non illi esset coæterna.

FEL. dixit : Quod nascitur, finem habet : quod innatum, non habet finem.

AUC. dixit : Quibus ergo erat ille pater, aut cuius erat pater, quem modo patrem nominavit ? Si enim nihil generat, pater esse non poterat.

FEL. dixit : Sed sunt alia quæ generavit.

AUC. dixit : Illa ergo quæ generavit, non sunt illi coæterna, an et ipsa coæterna sunt ?

FEL. dixit : Coæterna sunt illi quidquid Deus generavit.

AUC. dixit : Ergo errasti, quod superius dixisti, *Omne quod nascitur, finem habet.*

FEL. dixit : Interim quia secundum generationem carnis locutus sum, erravi.

AUC. dixit : Modestissime confessus errarem, merearis intelligere veritatem.

FEL. dixit : Faciat Deus.

AUC. dixit : Attendo ergo jam, ut incipias cognoscere errorem scripturæ bujus. Si quæ genuit Deus, coæterna non sunt illi, melior est terra illa quam non generavit Deus, ubi habitant omnia quæ generavit Deus, quam terram dicis ab eo non generatam.

FEL. dixit : Coxequantur sibi omnia, et quæ generavit, et quæ non generavit, id est, terra illa ubi commorabatur.

AUC. dixit : Quid, ipse qui generavit, æqualis est illis omnibus, aut major est illis ?

FEL. dixit : Et qui generavit, et quos generavit, et ubi positi sunt¹, omnia æqualia sunt.

AUC. dixit : Unius ergo substantiae sunt ?

FEL. dixit : Unius.

AUC. dixit : Hoc quod est Deus pater, hoc sunt filii ipsius, hoc et terra illa ?

FEL. dixit : Hoc unum sunt omnes.

AUC. dixit : Hujus ergo terræ non est pater, sed inhabitator ?

FEL. dixit : Etiam.

AUC. dixit : Sic nec genuit illam, nec fecit illam, quomodo ad eum pertinet nisi sola vicinitate non video, quomodo si habeat aliquis vicinum bonum : et duæ jam erunt res ambo ingenitæ, terra et pater.

FEL. dixit : Imo tres sunt, pater ingenitus, terra ingenita, et aer ingenitus.

AUC. dixit : Hoc totum una substantia est ?

FEL. dixit : Una.

AUC. dixit : Et ita fundata, ut a nullo unquam moveri aut conculi possit ?

¹ Apud Fr. Lugd. Ven. Iov., poëta sumt. M.

FEL. dixit : Motio et concussio habet distantiam.

AUG. dixit : Habeat : sed tamen talia fuerunt , ut a nullo unquam moveri aut concuti possent ?

FEL. dixit : Est distantia inter moveri et concuti.

AUG. dixit : Non inde te interrogo.

FEL. dixit : Sed inde me vis tenere.

AUG. dixit : Quomodo vis , accipe Moveri : non poterat moveri ?

FEL. dixit : Non dico quia non poterat moveri , sed motio distantia est.

AUC. dixit : Sed ita dixi , Nec moveri , nec concuti. Non dixi , Moveri quidem potest , sed concuti non potest ; aut , Concuti quidem potest , moveri non potest : sed ambas res dixi , non posse nec moveri , nec concuti.

FEL. dixit : De ambabus rebus distantia est inter moveri et concuti.

CAPUT XIX.—AUC. dixit : Legamus ergo sequentia , videamus si Deus iste qui fundata habebat regna super lucidam et beatam terram , quæ a nullo unquam moveri et concuti possunt , neminem timuit , sicut oportebat ut neminem timeret , cuius regna sic fundata erant , ut a nullo aut moveri aut concuti possent. Et legit sequentia : *Juxta unam vero partem ac latus illustris illius ac sanctæ terræ. Et cum legeret interrogavit: Quod latus? dextrum, an sinistrum?*

FEL. dixit : Hanc tibi ego non possum interpretari scripturam , et exponere quod ibi non est : ipsa sibi interpres est ; ego non possum dicere , ne forte incurram in peccatum.

AUC. dixit : Legatur hoc ergo quod sequitur. Et cum legeret , et ventum esset ad locum ubi habet , *Lucis vero beatissime Pater* , sciens labem magnam ac vastitatem qua ex tenebris surgeret , adversus sua sancta impendere saecula , nisi quod eximium ac præclarum et virtute potens numen opponat , quo superaret simul ac destruerat stirpem tenebrarum , qua existincta perpetua quies lucis incolis pararetur ; Augustinus dixit : Nunc jam quia coepérunt apertæ blasphemiae , si defendendas putas , dic quid ista gens tenebrarum , quam videtur Deus timuisse , ne magna labes et valetas ex tenebris in regna ejus irruerent , nocere poterat Deo ; maxime cunctus regna superioris dixit ita fundata , ut a nullo unquam moveri aut concuti possent. Quid ergo illi factura erat gens ista ? Poterat ei nocere , an non poterat ? Responde unum e duobus.

FEL. dixit : Ego respondeo : Si nihil contra Deum est , secundum quod dixit scriptura Manichæi , quia est alterum regnum ; pro qua causa Christus missus est , ut nos liberaret de laqueo mortis bujus ? cuius est iste laqueus et mors ? Si adversarius nullus contra Deum est , utquid baptizati sumus ? Utquid Eucharistia , utquid Christianitas , si contra Deum nihil est ?

AUC. dixit : Quia video te nolle respondere ad id quod te interrogo , et te interrogare ut tibi respondeam ; et hoc non recuso : dum tamen memineris quia tibi interroganti ego respondeo , tu autem mihi est ?

interroganti respondere nolusti. Sed quia me interrogasti , audi quod interrogasti. Nos quidem dicimus liberatorem Christum venisse , et a peccatis nostris dicimus nos liberari , quia nos non sumus de substantia Dei geniti , sed per ejus Verbum facti a Deo. Multum autem interest inter natum de substantia Dei , et factum a Deo quod non est de substantia Dei. Quidquid ergo fecit Deus , potest esse mutabile ; ipse autem Deus non est mutabilis : quia non possunt ægnari opera artifici et conditori. Tu autem qui paulo ante ad interrogationem meam dixisti , quia et *Pater qui generavit ibi lucis filios* , et *aer* , et *ipsa terra* , et *ipsi filii una substantia sunt* , et *æqualia sunt omnia* ; oportet ut dicas mihi , huic substantiae utique incorruptibili quomodo poterat nocere gens tenebrarum. Si enim poterat nocere ei , non erat natura incorruptibilis : si autem non poterat , nulla causa erat quare prælum agitaret , et illud numen quod dicit , huc mitteterat.

FEL. dixit : Dilationem peto , ut possim responderem.

AUC. dixit : Quando ? Cras intermissus sufficit ?

CAPUT XX. — FEL. dixit : Intermitte mihi tres dies , id est , hodie , et cras , et perendie , aut usque ad diem qui est post dominicum , id est , pridie idus decembries.

AUC. dixit : Video te dilationem ad respondentem petuisse ; humanum est ut concedatur tibi : sed si respondere non potueris ad præstitutum diem , quid fiet ?

FEL. dixit : Ero victus.

AUC. dixit : Quid , si fugeris ?

FEL. dixit : Reus ero civitatis tuujus , et ubique , et legis meæ.

AUC. dixit : Imo hoc dic : Si fugero , sic habear tanquam si ana hemavero Manichæum.

FEL. dixit : Hoc dicere non possum.

AUC. dixit : Ergo aperte nobis dic quia fugere cogitas , et nemo te tenet.

FEL. dixit : Non fugio.

AUC. dixit : Ut video , non vis quasi victus abscedere : sed saltem hoc dic , Si fugero , victus sum.

FEL. dixit : Dixi.

AUC. dixit : Et unde apparebit te fugisse propter Gesta ?

FEL. dixit : Jube ut quem elegero , cum ipso sim.

AUC. dixit : Elige tibi aliquem de præsentibus istis fratribus , qui ad cancellum stant.

FEL. dixit : Sim cum illo qui est in medio.

AUC. dixit : Sicut tibi elegisti , usque ad diem cum illo eris.

FEL. dixit : Etiam , et ego hoc consentio.

BONIFACIUS dixit¹ : Præstabit Christus , ut si cum illo veniam , christianus es.

¹ Er Iugd. Ven. Lov. hæc et superiora sic legunt : AUC. dixit : Elige tibi aliquem de istis præsentibus fratribus qui ad cancellum stant. FEL. dixit : Etiam et ego consentio : sed cum illo qui est in medio. AUC. dixit : Sicut tibi elegisti , usque ad diem cum illo eris. BONIFACIUS dixit, etc. M.

Augustinus episcopus Ecclesiae catholicae Hippo-nereiensis, his in ecclesia coram populo Gestis subscripti.

Felix christianus, cultor legis Manichaei, his in ecclesia coram populo Gestis subscripti.

LIBER SECUNDUS.

ACTA SECUNDÆ DIEI.

800-80

CAPUT PRIMUM. — Cum ventum esset ad diem præstitutum, id est, ad pridie iduum decembrium, res sic agi cœpit in ecclesia Pacis. Augustinus episcopus Ecclesiae catholicae Hippo-nereiensium regionum dixit: Pridem cum sermonem haberemus, dilationem te petuisse meministi, cum ad eā quæ interrogaveram in presenti respondere non posses. Si ergo tam lato temporis spatio, post diem scilicet quintum aliquid excoxitasti, responde. Hoc enim tunc interrogaveram: Si Deo nocere nihil poterat, quare bellum gessit enim gente quam dicitis tenebrarum, in quo bello naturæ dæmonum misceret substancialiam suam, quæ hoc est quod ipse, sicut jam interrogatus dixisti? Si autem nocere ei poterat, non incorruptibilem Deum colitis, qualē veritas et apostolica doctrina testatur.

FELIX dixit: Ex quo a Sanctitate tua recessi, ut ad diem constitutum reversas essem, ut responderem tine interrogationi, quæcumque velles interrogare, ventum est ad diem: et quia nullam scripturam inter manus habui, quia non mihi sunt redditæ unde me instruere possem; nullus enim ad certamen exi, nisi prius munitus¹ fuerit, et nullus litigator potest sine suis chartis litigare; similiter et ego sine mea scriptura respondere non possum.

AUG. dixit: Istam tergversationem tanto dierum spatio excoxitasti, quæ te in causa perdita et errore sacrilego quid respondeas non habentem adjuvare nihil poterit. Notum est enim omnibus qui aderant, quos etiam nunc adesse video, te dierum tantum dilationem petuisse: debuisse autem petere etiam codices, quando dilationem petiisti, si his te putabas instrui posse ad respondendum; quod non fecisti. Novi te petuisse codices, non quidem ad instructionem inspiciendo, verum hoc longe antequam peteres dilationem: cum vero dilationem petiisti, codicum tibi reddendorum et inspicendorum, ut esse posses instruictior, nullam fecisti mentionem.

FEL. dixit: Modo peto codices, reddantur mihi, et venio ad certamen post biduum; et si victus fuero, quod deliberaveris, subeo.

AUG. dixit: Rudem te in ista scelerata secta non esse puto, quod et fateris. Non te autem habere quod respondeas, et i tu non fateris, omnis homo jam videt. Sed quia codices tuos repetis, qui sub sigillo publico custodiuntur, quibus inspectis dicis te instructum venire posse post biduum; illud quod jam constat, obiectis questionibus te respondere non potuisse recole.

¹ Ann. et MSS., militatus.

Tolle autem codices tuos, et dic quid inde velis tibi proferri, quod modo inspicias et respondeas.

FEL. dixit: Omnes scripturas quæ mihi sublatas sunt. Ista enim epistola Fundamenta est, quod et Sanctitas tua bene scit, quod et ego dixi, quia ipsa continet initium, medium et finem. Ipsa legatur, et quidquid malum objicitur legi meæ, probetur: et nego illam, si probata fuerint illa crimina quæ objiciuntur legi meæ.

AUG. dixit: Quoniam fateris hanc esse epistolam, ubi doctrinæ vestræ initium, medium et finis continentur, hoc initium quam sit sacrilegum, ubi Deum dicitis pugnasse contra gentem tenebrarum, et miscuisse naturæ dæmonum polluendam et ligandam partem suam, quæ hoc est quod ipse; tam sacrilegum est, ut ferri vix ab audientibus possit: hoc objicitur primo sectæ vestræ, sive initium hoc voces, sive medium, sive finem, non valde id curio; hoc tamen de hac epistola, quam fateris esse Manichæi, lectum esse non negas; hoc vobis objicitur, hoc defende, si potes, ut ad alia veniamus. Unde iterum interrogo: si Deum incorruptibilem colitis, quid ei nocere poterat, nescio quæ gens adversa quam finitis? Si nihil ei nocere poterat, nulla causa fuit quare partem suam naturæ dæmonum commisceret. Si autem nocere ei poterat, non Deum incorruptibilem colitis.

CAPUT II. — **FEL.** dixit: Manichæus dicit duas esse naturas, et modo inde culpatur, quia dixit duas esse, bonam et malam. Christus in Evangelio duas dicit esse arbores: Arbor bona nunquam facit fructum malum, et arbor mala nunquam facit fructum bonum (Matth. vii, 17). Ecce duas naturas. Deinde in Evangelio scriptum est: Numquid bonum semen seminasti in agro? Unde apparuerunt zizania? Hoc inimicus fecit (Id. xiii, 27, 28). Iste inimicus si non est extraneus a Deo, probetur mihi: si ad Deum pertinet inimicus iste, quale semen seminavit? Item in Evangelio scriptum est, Christo dicente, quia in novissimis temporibus thronum in medio sacculo ponet, et mittet Angelos suos in orientem et occidentem, septentrionem et meridiem, et congregabit omnes gentes ante se, et separabit illos, sicut pastor separat agnos ab oves. Et ut compendive dicam, agnis dicet: Ite in regnum quod vobis paratum est ab origine mundi. Hædis dicet, qui in sinistra parte sunt: Recedite a me, qui operati estis iniquitatem: nomen enim meum habuistis, sed opera non fecistis; ite in ignem æternum, qui paratus est diabolo et angelis ejus (Id. xxv, 31-41).

Qui sunt qui nomen Christi habent, et mittuntur in ignem æternum cum diabolo et angelis ejus; et ad quam partem pertinent isti, quibus Christus non permiscetur, et nomen ejus portant? Hoc enim Manichæus dicit, quia quos Christus damnat, ipsius non sunt. Nam Paulus apostolus dicit: *Prudentia carnis inimica est Deo; legi enim Dei non est subjecta, nec enim potest* (Rom. viii, 7). Hoc Manichæus dicit, quia quæ inimica est Deo, ad Deum non pertinet: si autem ad Deum pertinet, ipse sibi inimicum fecit: hoc Manichæus non dicit. Iterum Paulus dicit: *Deus sæculi hujus excavavit mentes infidelium, ad non contemplandam claritatem Evangelii Christi, qui est imago Dei* (II Cor. iv, 4). Ipse Paulus iterum dicit: *Datus est mihi stimulus carnis¹, angelus satanæ, qui me colaphizet die ac nocte: propter quod ter Dominum rogavi ut discedere a me; et dixit mihi: Sufficit tibi gratia mea; nam virtus in infirmitate probatur* (Id. XII, 7.9). Ecce quid Apostolus dixit, ecce quid Evangelista: cum Manichæus hoc asserat, quia est extraneus a Deo, qui contra Deum bellavit: sive quia Christus crucifixus est, sive quia Apostoli omnes propter Dei mandatum; iste qui eos crucifixit, cui mandatum Dei non placet, hoc mihi dicat Sanctitas tua, si ad Deum pertinet.

CAPUT III. — Aut. dixit: Scripturas sanctas, quas non intelligendo longe a veritate aberratis, commemorare voloisti, velut ex eis patrocinium adhibens vaniloquii vestris. Inter omnia tamen, quæ partim sicut vere scripta sunt, partim aliter quam scripta sunt commemorasti, nusquam ostendere potuisti quia Deus regnis suis hostilem naturam imminentem repellere volens, ut habeat quietem, partem suam, quæ hoc est quod ipse, naturæ contrariae dæmonum miscens, colligari ab eis et contaminari fecerit. Hoc autem est quod vobis objicitur, unde quid respondeas non inveniendo, commemorasti divinarum Scripturarum capitula, ubi de peccatoribus dictum est quia non pertinent ad beatam vitam, quam bonis et fidelibus donat Deus: et has velut duas naturas accipi voluisti, secundum deliramenta Manichæi. Veritas autem dicit, omnia ista quæ videmus et quæ non videmus, quæ naturaliter subsistunt; a Deo facta esse: in quibus rationalem creaturam, etiam ipsam factam, sive in Angelis sive in hominibus accepisse liberum arbitrium; quo libero arbitrio si Deo servire vellet, secundum voluntatem ac legem Dei, haberet apud eum æternam felicitatem: si autem legi ejus subdi noluisset, sed potestate sua usa contra ejus fecisset imperium, secundum ejus justitiam pœnæ debite subjaceret. Ilac omnipotentia Dei in creandis omnibus², hoc justitia in remunerandis peccatoribus. Esse autem liberum arbitrium, atque inde peccare quemque si velit, non peccare si nolit, non solum in divinis Scripturis, quas non intelligitis, sed etiam in verbis ipsius Manichæi vestri probo. Circumclusus enim videt potentiam veritatis, contra quam conatus

fuerat alias naturam quam non fecit Deus, inducere contra Deum, non solida veritate, sed inaniphantasmate: tamen ad confitendum verum de libero arbitrio, plus in eo valuit natura humana in qua eum Deus effectit, quam fabula sacrilega quam sibi ipse confinxit.

CAPUT IV. Audi ergo de libero arbitrio, primo ipsum Dominum, ubi duas arbores commemorat, quarum mentionem ipse fecisti: audi dicentem, *Aut facite arborem bonam et fractum ejus bonum, aut facite arborem malam et fractum ejus malum* (Math. xi, 33). Cum ergo dicit, *Aut hoc facite, aut illud facite*; potestatem indicat, non naturam. Nemo enim nisi Deus facere arborem potest: sed habet unusquisque in voluntate, aut eligere quæ bona sunt, et esse arbor bona; aut eligere quæ mala sunt, et esse arbor mala: non quia mala ipsa quæ eliguntur, aliquam habeant in se ipsis substantiam; sed quia Deus, omnia quæ condidit, gradibus suis condidit, generibusque distinxit, coelestia atque terrena, immortalia atque mortalia, et omnia bona in suo genere condidit: animam habentem liberum arbitrium, sub se ipso et supra cætera collocavit; ut si serviret superiori, dominaretur inferiori; si autem offenderet superiore, pœnam ex inferiore sentiret. Ilac ergo Dominus dicens, *Aut facite illud, aut facite illud*; ostendit esse in potestate quid facherent, ipse securus et certus in se tanquam Deus; et quia si bonum eligerent, pœnum ejus acciperent, si malum eligerent, pœnam ejus sentirent: semper autem ille justus est aut remunerator, aut damnator.

CAPUT V. — Audi ergo jam quemadmodum Manichæus ipse tam perversus, tam superbus, ut aliam introducens naturam, se æqualem Deo faceret, Deum ad se ipsum deponeret, confessus sit tamen esse liberum arbitrium: in Thesauro vestro, cui tale nomen ad decipiendos homines indidisti, certe sic loquitur, quod et tu ipse cognoscis. *Ni vero qui negligenter sua a labe prædictorum spirituum purgari se minime pernixerint, mandatisque divinis ex integro parum obtemperaverint, legemque sibi a suo liberatore¹ datam plenius servare noluerint, neque ut decebat sese gubernaverint, etc.* Vides in his verbis confirmatum esse, etiam a nesciente quid loqueretur, liberum arbitrium. Qui cnius servare legem non vult, in potestate ejus est, si velit. Non enim dixit, Non potuerint; sed, *noluerint*. Hoc certe quod nolunt servare legem, non a gente tenebrarum coguntur: si enim coguntur, non nolunt, sed non possunt; si autem nolunt, non utique coguntur ut non faciant, sed voluntate sua nolunt. Hoc ergo quod in eorum voluntate est ut nolint, peccatum est certe sine aliqua necessitate gentis tenebrarum. Hoc agnosce esse precatum sine necessitate gentis tenebrarum: et inde vides unde veniant omnes culpæ, unde merita culparum, unde distributiones pœnarum.

CAPUT VI. — Habetis etiam hoc in scripturis

¹ Editi, carnis meæ. Abest, meæ, a manuscriptis.

² Editi, hominibus. Melius MSS., omnibus.

Sic MSS. At editi, a Deo liberatore.

specryphis, quos canon quidem catholicus non admittit, vobis autem tanto graviores sunt, quanto a catholicis canone secluduntur. Aliquid etiam inde commemorem, cuius ego auctoritate non teneor, sed tu convinceris. In Actibus scriptis a Leutio¹, quos tanquam Actus Apostolorum scribit, habes ita positum: *Etenim speciosa figura, et ostentatio simulata, et coactio visibilium, nec quidem ex propria natura procedunt, sed ex eo homine qui per se ipsum deterior factus est per seductionem.* Vide quemadmodum hic, et per se ipsum dicit, et per seductionem. Fuit enim seductor hominis diabolus, non natura peccator, sed prior voluntate peccator. Sed quia erat in hominis potestate seductori non consentire, ideo positum est, et per se ipsum, et per seductionem: ut in eo quod positum est, per se ipsum, liberum arbitrium; in eo vero quod positum est, per seductionem, intelligas diabolum, non oppressorem inviti, sed tentatorem volentis.

CAPUT VII. — Proinde quia ego respondi, et quantum potui probavi ea quo scripta sunt in Libris sanctis de peccatoribus et de justis, non ad diversitatem naturarum, sed ad distinctionem meritorum pertinere, in quibus meritis non necessitatem natura facit; sed voluntas culpam; responde tu ad illud quod jam interrogavi: Si Deo nocere nihil poterat, quare partem suam, substantiam suam, hoc quod ipse est, polluendam et ligandam dæmonibus miscucrit, quod in nulla divina Scriptura canonica potueris invenire: si autem nocere ei poterat, non Deum incorruptibilem colitis, de quo Apostolus dicit, *Regi autem seculorum immortali, invisibili, incorruptibili, soli Deo honor et gloria in sæcula seculorum* (*I Tim. i, 17*). Denique idem dicit: *Deus habilit lucem inaccessiblem* (*Ibid. vi, 16*). Numquid ad illam lucem non accidunt sancti, de quibus scriptum est, *Accedite ad eum, et illuminamini* (*Psal. xxxiii, 6*)? Numquid ad illam lucem non accidunt de quibus dicitur, *Beati mundo corde, quoniam ipsi Deum videbunt*² (*Math. v, 8*)? Sed quia non ad eam potest accedere, nisi cui Deus ipse donaverit ut accedat, ideo per se ipsam inaccessible est. Nemo enim potest ad eam accedere, quem Deus noluerit ut accedat: cui autem donaverit, ipse accedit. Quomodo ergo poterat illa gens tenebrarum accedere ad habitationem Dei, ubi est inaccessible lux, quo non accedit nisi cui Deus donaverit? Aut si donum accepérat a Deo ut accederet, ad expugnandum regnum Dei non daret, et non timeret. Si autem donum tale non dederat ut posset accedere; securus in suo regno erat, habitans inaccessiblem lucem: quid poterat de tenebrarum gente metuere, ut ei misceret partem suam, substantiam suam, hoc quod ipse est, ligandam, premendam, contaminandam, ubi non solum miserabiliter teneretur, sed etiam turpiter purgaretur? Ut enim purgetur inde, dicitis quod audire nefas est, sed ad vos confun-

¹ In Victorinis codicibus scribitur, *Levitio*. Apud Am. et Er. *Lenticio*. vide infra, librum de Fide contra Manicheos, cap. 5.

² Er. Lugd. Ven. Iov., nonnullis hic omissis, banc lectio nem habent, *illuminamini; et illud, Beati*, etc. M.

dendos et forte salvandos, tacere non possimus: ut purgetur inde pars Dei, dicitis in nave lucis, quam solem appellatis, facientes injuriam Creatori solis, et ipsi soli quem sic dicitis factum, ubi tanta turpitudo celebretur: dicitis enim illic positum Deum, virtutes suas convertere in masculos, ad irritandum concupiscentias dæmonum seminarum; et eosdem rursus convertere in feminas, ad irritandum concupiscentias dæmonum masculorum; ut cum dæmonis injiciunt libidinem, accensis in formas conflictas a Deo, relaxentur membra eorum, et sic evadat pars Dei qua ibi fuerit colligata. Hoc tantum opprobriuni, hec tantum sacrilegium credere ausi estis, et praedicare non dubitatis. Hæc sunt media doctrinæ vestre. Finis vero quis est? Quis, nisi quia non potuit Deus totum purgare? Et quia non potuit, facturum inde dicitis velut lectorum genti tenebrarum, ut ibi in æternum damnetur quod purgari non potuit, et nihil sua sponte commisit. Ita sit ut deas vester, non verus, sed fictus, non alicubi constitutus, sed in corde vestro imaginatus, partem suam misceat infeliciter, purges turpiter, damnet crudeliter. Ad hæc ergo responde, et incipe ab illo quod dixi, quare Deus miscuit istam partem suam, cui nihil nocere poterat; aut si potuit, quomodo sit incorruptibilis.

CAPUT VIII. — FEL. dixit: Crudele asseritis Manichæum hæc dicentem: de Christo quid dicimus, qui dixit, *Ite in ignem æternum* (*Math. xxv, 41*)?

AUG. dixit: Peccatoribus hoc dixit.

FEL. dixit: Iste peccatores quare non purgati sunt?

AUG. dixit: Quia noluerunt.

FEL. dixit: Quia noluerunt, hoc dixisti?

AUG. dixit: Hoc dixi, quia noluerunt.

FEL. dixit: Quare noluerunt? Est qui non vult curari? est qui non vult purgari? est qui non vult illuminari? Quis infirmus est qui non vult ad sanitatem venire? Si crudele est quod Manichæus dixit, quia aliqua pars Dei quæ se purgare non potuit, in globo ligata est: hoc crudole non est, ut Christus qui dixit, Ego propter peccatores veni; modo ad ignem æternum illos mittat, cuius nomen portaverunt? Sed mandata, credo, non potuerunt complere. Si hoc crudelis est, crudelius est et illud. Si illud crudelius est, quia Deus illos non potuit purgare, et globo ligavit; et id crudelius videtur esse, quos Christus non potuit purgare, ad ignem æternum mittere: hoc mihi Sanctitas tua exponat de ipsa crudelitate.

AUG. dixit: Si ea quæ jam dixi, vel intellexisses, vel te intelligere fatereris (fortassis enim non habendo quid dicas, finisti te non intelligere quod apertum est), ista non dices. Jam enim diximus et probavimus per divinas Scripturas, esse liberum arbitrium: Deum autem esse liberi arbitrii justum judicem, remuneratorem fidelium eique se subjacentium et voluntium se sanari, damnatorem autem superborum et impiorum. Quia ergo ad peccatores sanandos venit, sanat utique peccata confessos, sanat poenitentes: neminem autem poenitet cum aliis peccavit: sed si est poenitentia justa et verax, unde et ipse Dominus

dicit, *Non veni vocare justos, sed peccatores in pœnitentiam* (*Math. ix, 13*) ; ipsa pœnitentia indicat non alienæ esse naturæ, sed voluntatis nostræ, si quid forte peccamus. Nam si alio peccante, alium pœnitit, non est ista prudens, sed insana pœnitentia. Secundum vos autem nulla peccata sunt. Gens enim tenebrarum non peccat, quia suam naturam facit : natura lucis non peccat, quia quod facit, facere cogitur. Nullum ergo invenis peccatum quod damnet Deus, nullum invenis peccatum quod pœnitentia possit sanari. Si autem pœnitentia est, et culpa est : si culpa est, et voluntas est : si voluntas est in peccando, natura non est quæ cogat. Sed si quid infirmitatis patiuntur, qui non possunt implere quod volunt; unde Apostolus Paulus dicit, *Videlicet aliam legem in membris meis, repugnantem legi mentis meæ, et captivantem me in lege peccati, quæ est in membris meis* (*Rom. vii, 23*) : manifestum est hoc venisse de traduce primi peccati Adam, et de consuetudine mala. Nam hodieque¹ libera voluntate faciunt homines consuetudinem, quam cum fecerint, facile superare non possunt : ipsi ergo sibi de se ipsis fecerunt, quod contraria lex habitet² in membris eorum. Sed qui concipiunt timorem Dei, et per liberum arbitrium subdunt se sanandos optimo medico, et sicut bono curatori, ita et misericordi creatori, per humilitatem confessionis et pœnitentiae sanantur. Superbi vero dicentes se iustos, aut dicendo quia non peccant ipsis, sed aliud in illis peccat, et alia natura de illis peccat, per ipsam superbiam suam et insanabiles fiunt, et experiuntur iustum judicium Dei, qui superbis resistit, humiliibus autem dat gratiam (*Jacobi iv, 6*). Non est ergo indignum ut Deus dicat, *Ite in ignem æternum, eis qui ejus misericordiam per liberum arbitrium respuerunt : et dicat, Venite, benedicti Patris mei, percipite regnum* (*Math. xxv, 41, 31*), eis qui per liberum arbitrium fidem ejus suscepserunt, peccata sua confessi sunt, pœnitentiam egerunt, displicerunt sibi quales fuerunt, et quales per eum facti sunt illi pliquerunt. Tu ergo jam ad hoc quod interrogavi responde : sed impetrem a te, ne moras superflua faciamus : Si Deo nocere nihil poterat, quare hoc nos misit ? Si nocere poterat, non est incorruptibilis Deus.

CAPUT IX. — **FEL.** dixit : Si Deo nocere nihil poterat, quare hoc Filium suum misit ?

AUG. dixit : Vide quemadmodum semper interrogas, et ad interrogata respondere non vis. Audi quod interrogasti, memento tamen te ad ea quæ dico non respondere, ma autem respondere. Deo nocere nihil potest : sed Filium suum misit, ut carne indueretur, et hominibus appareret, peccatores sanaret, in ipsa carne pateretur pro nobis, quia sumpsit ex nobis. In sua quippe natura pati nihil poterat ; quia in principio erat Verbum, et Verbum erat apud Deum, et Deus erat Verbum. In hac natura, quia Deus erat Verbum, pati nihil ille poterat. Ut autem pati pro nobis posset,

Verbum caro factum est, et habitavit in nobis (*Joan. i, 1, 14*). *Verbum caro factum est*, assumendo carnem, non mutatum in carnem : assumpsit enim humanitatem, non amisit divinitatem. Itaque idem Deus et idem homo, in natura Dei æqualis Patri, in natura hominis factus mortalis, in nobis, pro nobis, de nobis, manens quod erat, suscipiens quod non erat, ut liberaret quod fecerat, non quod erat. Non est ergo passio Christi ex indigentia, sed ex misericordia. Præbuit enim exemplum patientie nobis de nobis, id est homini de homine, carni de carne : non tamen in illa carne ipse deterior factus ; sed caro in illo melior facta est. Pars vero dei vestri, nulla carne assumpta (non enim erat in gente tenebrarum pro qua pateretur), descendit ut teneretur, ligaretur, pollueretur, et turpius quam ligabatur purgaretur. Jam enim de purgatione ejus dixi. Hæc omnia quanto indigniora sunt, tanto utique faciliora ad intelligentium quoniam in naturam Dei ista non cadunt. Et abeit a pio animo atque fidei talia de Deo credere, Deo bono, Deo vero, qualia vos creditis ; non quem invenistis, sed quem finxistis. Responde jam nunc : Si Deo nocere nihil poterat, pura illa substantia ipius, nulla carne assumpta in se passura, si quid passura erat, non in carne quam suscepserat, quare huc missa est secundum vestra vaniloquia ?

CAPUT X. — **FEL.** dixit : Si nihil poterat noceri Deo a parte adversa, et Christo nihil poterat noceri ab adversa natura ; ad quam venit Christus, ut eam liberaret ? Quia, ut dicis, propter libertatem nostram venit : ergo in captivitate fuimus. Si in captivitate tenebamur, et propterea Christus venit, ut nos liberaret de captivitate, qui nos tenebat extraneus a Deo erat, aut virtus Dei. Si Dei virtus erat qui nos tenebat, utquid Christum mittebat ille qui nos tenebat ? Si in ipsius arbitrio erat quando vellet dimittere, utquid Christus crucifigitur ? Neminem autem latet Christum crucifixum. Quid illum crucifixerunt ? Si Dei virtus est, nihil nobis nocebat. Si Dei virtus erat, non fuimus capti apud illum : sed quasi nos cum nostro principe, quasi filius cum parentibus, non autem Romani cum Barbaris. Non oportebat ergo, quia cum virtute Dei constituti eramus, Deum Filium suum mittere, ut dicatur quia liberator noster venit. Si pareat ergo cum virtute Dei nos constitutos esse : Apostolus dixit³, *Christus nos liberavit de maledicto Legis ; quia scriptum est, Maledictus omnis qui pendet in ligno* (*Galat. iii, 13*; *Deut. xxii, 23*). Hoc enim Apostolus dicit. Si iste qui maledicit omnes qui pendet in ligno, Dei virtus est : Christus enim pependit in ligno, et Apostoli ipsius omnes qui addicti sunt pro ipsius præcepto : quis ergo iste est qui maledicit omnem qui pendet in ligno ?

CAPUT XI. — **AUG.** dixit : Quos Christus redemit a diabolo, per consensionem suam tenebantur a diabolo, et in ejus conditione constituti erant per justum

¹ Fr. Engd. Ven. Lov., *hodie*. M.

² In Næs., *quod contra eos habuit*.

³ Ven., ut apostolus dixit, addita vocula, ut. M.

Dei judicium, cui seducenti consenserant per liberum arbitrium. Sicut autem in hominis potestate fuit diabolus consentire, ut captivaretur; sic in ipsius diaboli potestate fuit, cum angelus esset, peccare, ut in deteriorius mutaretur. Peccator ergo angelus per liberum arbitrium, suasit peccatum homini habenti liberum arbitrium; ut diabolus si noluisset non peccasset, et homo si noluisset non consensisset. Cum autem jam ab illo cui consenserat teneretur, non quia diabolus aliquid potuit, sed quia justum Dei judicium fuit, et ejus legi obtemperare noluit: quia ergo sic invenit Christus peccatores sub peccato, redemit conscientes a superbiente. Quod autem in Lege positum est, *Maledictus omnis qui pendet in ligno*; unde Apostolus dicit, *Christus nos redemit de maledicto Legis, factus pro nobis maledictum; scriptum est enim, Maledictus omnis qui pendet in ligno*: non Legem reprehendit, sed misericordiam commendavit. Quia enim Adam peccaverat, et omnis illa massa et propago peccati maledicta erat; Dominus autem carnem de ipsa massa suscipere voluit, ut suscipiendo mortalitatem quæ de poena venerat, solveret mortem, quod de gratia veniebat: ideo dicit Lex, *Maledictus omnis qui pendet in ligno*. Mors enim ipsa pendebat in ligno, quæ mors de maledicto veniebat. Quomodo ergo suscipiendo mortem, interfecit mortem; sic suscipiendo maledictum, solvit maledictum. Unde et Apostolus dicit, *Scientes quia vetus homo noster simul confixus est cruci cum illo* (*Rom. vi, 6*): quia de vetere homine nostro, id est, de sorte mortis, quæ veniebat ex merito peccati, suscipere dignatus est carnem mortalem de virginе Mariа, in qua nobis et passionis et resurrectionis præberet exemplum; passionis, ad firmandam poenitentiam; resurrectionis, ad excitandam spem: ut duas vitas nobis ostenderet in carne, quam suscepit de vita nostra mortali, unam laboriosam, alteram beatam; laboriosam, quam tolerare debemus; beatam, quam sperare debemus. Toleramus autem labioriosam merito peccati nostri: ille autem ostendit eam in carne sua, non merito iniquitatis suæ, sed officio misericordiae suæ. Nam ut noveris bonam esse Legem, quam tu reprehendere voluisti, ipse apostolus Paulus quodam loco dixit: *Lex subintravit, ut abundaret delictum*. Adhuc videtur illam reprehendere; sed audi quod sequitur: *Ubi autem, inquit, abundavit delictum, superabundavit et gratia* (*Id. v, 20*). Data est enim lex superbis hominibus, et viribus suis totum tribuentibus, ut cum implete non possent legem datam, prævaricatores invenirentur, et facti rei sub lege, peterent misericordiam a legis Conditore. Proinde paulo post dicit idem apostolus: *Itaque lex quidem sancta, et mandatum sanctum, et justum, et bonum*. Sed ne dicas quia de alio mandato dicit, ut ostenda quia de illo dicit, de quo paulo ante dixerat, *Lex subintravit ut abundaret delictum*; statim sibi opposuit quæstionem: *Quod ergo bonum, mihi factum est mors?* Absit: sed peccatum, ut appareat peccatum, per bonum mihi operatum est mortem (*Id. vii, 12, 13*). Erat enim peccatum, sed non apparebat peccatum:

data est lex superbo, fecit contra legem, et apparuit peccatum, quod erat, sed non apparebat. Apparens autem peccatum humiliavit superbum, humiliatus superbus factus est poenitens, de poenitentia imperata est misericordia. Audisti ergo quod interrogasti, responde quod interrogo: Nihil nocere poterat gens tenebrarum Deo; quare hoc misit partem suam miscendam et polluendam a natura dæmonum?

CAPUT XII. — FEL. dixit: Si in arbitrio nostro sumus, nemo neminem cogat: quando voluero, ero christianus. Voluntas nobis subjacet, aut esse christianum, aut non esse.

AUG. dixit: Quia voluntas nobis adjacet, manifestum est, et hoc de divinis Scripturis docui; quod coactus est etiam invitus dicere, etiam ille qui vos in istum induxit errorem. Quod autem dicas, *Nemo cogatur, quando voluero, ero christianus*: nemo plane te cogit; quando volueris, esto: quia ex voluntate tua hoc venisti, et ex voluntate tua ista disputasti. Et vae voluntati male, si mala est; pax bonæ voluntati, si bona est. Sive autem mala sit, sive bona sit, voluntas est. Bonam voluntatem sequitur corona, malam sequitur poena. Deus judex voluntatum est, creator autem naturarum. Si ergo putas cogi te ut sis christianus, audi a nobis omnino te non cogi. Cogita potius quæ audis, perpende, in tua voluntate es: examina ut prudens, si tamen in te est illa prudentia vel humana, utrum ea quæ dicta sunt, veritate fulta sint; utrum tu ipse in Manichæi vestri defensione defeceris, sicut appeti: et quando volueris, esto quod nondum es, et desine esse quod es.

CAPUT XIII. — FEL. dixit: Ecce jam compendive, ut dixit Sanctitas tua: nec chartas cumulemus¹, si tibi placet, quod petivi pridem: huc veni; ostende mihi veritatem, ut illud quod teneo, pareat quia veritas non est, et habes me paratum ad credendum.

AUG. dixit: Jam quidem quod tenes, satis appetet quia veritas non est. Absit enim a cordibus veritatem querentium vel tenentium, ut credant Deum substantiam suam necessitate coactum mersisse dæmonum naturæ ligandam atque polluendam. Absit a fidelibus credere Deum ad liberandam substantiam suam convertere sc in masculos contra feminas, et in feminas contra masculos ad eorum concupiscentiam irritandani. Absit a fidelibus credere Deum substantiam suam, quam ipse dæmonibus mersit, postea in æternum dampnare. Illoc ergo quia veritas non est, manifestum est. Sed quia vis tibi pro ista falsitate expulsa atque convicta, patetieri veritatem, si quid de cognoscenda fide catholica adhuc movet, ab initio fidei poteris erudiri. Etenim aptum perceptioni veritatis incommutabilis facit pia fides: a qua fide quisquis incipere noluerit, superbis foris remanebit, et ad id quæ tendit, vel quo vult pervenire, perduci non poterit. Sed quia jam illa falsitas manifesta est, anathema fal-

¹ Er. Lugd. Ven. et Lov., omissa interunctione, sic egunt, tua ne chartas cumulemus. M.

sitatem, ut possis incipere aptus esse ad cognoscendam veritatem.

CAPUT XIV. — FEL. dixit : Cum apparuerit mihi, quia mihi non apparet, quia altera mili non ostensa est, non possum anathemandare.

AUG. dixit : Anathemandus est error qui dicit corruptibilem Deum, an non est anathemandus?

FEL. dixit : Iterum dic.

AUG. dixit : Anathemandus est error qui dicit corruptibilem Deum, an non est anathemandus?

FEL. dixit : Quæratur si dicit.

AUG. dixit : Ego hoc interrogavi, Qui dicit corruptibilem Deum, anathemandus est, an non?

FEL. dixit : Qui dicit corruptibilem Deum, anathemandus est; hoc mili objicis?

AUG. dixit : Hoc interrogo.

FEL. dixit : Corruptibilem Deum dicis, non autem quod primo dixisti, quia partem suam dedit adversariis?

AUG. dixit : Interim quod interrogo responde : Qui dicit corruptibilem Deum esse, anathemandus est, an non?

FEL. dixit : Valde.

AUG. dixit : Qui dicit corruptibilem esse naturam et substantiam Dei, anathemandus est, an non?

FEL. dixit : Non intellexi quod dixisti.

AUG. dixit : Hoc dico quod omnis homo intelligit, qui non se singit non intelligere : Naturam et substantiam Dei, id est, illud ipsum quidquid est Deus, qui dicit esse corruptibilem, anathemandus est, an non?

FEL. dixit : Etiam anathemandus est, si probatum fuerit esse verum.

AUG. dixit : Nondum tibi dixi, quia Manichæus dicit corruptibilem naturam Dei; sed hoc tibi dixi, quia quicumque hoc dicit, anathemandus est.

FEL. dixit : Et ego respondi, Etiam.

CAPUT XV. — AUG. dixit : Pars illa quæ tenebrarum genti mixta est, de Dei natura est, an de aliqua alia natura?

FEL. dixit : De Dei.

AUG. dixit : Quod de Dei natura est, hoc est quod Deus, an aliud quid quod non est Deus?

FEL. dixit : Ita est : quod de Deo est, Deus est, secundum quod scriptum est : *Lux lucet in tenebris, et tenebræ eam non comprehendenterunt* (Joan. 3, 5). Deus enim lumen est, et tenebræ in eo non sunt (I Joun. 3, 5).

AUG. dixit : Bene respondisti, quia et quidquid de Dei natura est, Deus est, et Deus lux est, et tenebrae in eo non sunt, et talis lux luxit in tenebris, et tenebræ eam non comprehendenterunt. Videamus ergo utrum Manichæus partem Dei non dicat esse comprehensam a tenebris, non etiam teneri ligatam, non etiam maculatam et pollutam, sic ut indigeat misericordia liberatoris et purgatoris. Si autem haec dicit, secundum te etiam, et secundum veras confessiones tuas, anathemandus est; quia partem Dei et naturam Dei, quod est ipse Deus, dicit comprehensam a tenebris et liga-

tam et pollutam : quod tu ipse secundum Evangelium loquens non potuisti dicere; sed verum dixisti, quia *lux lucet in tenebris, et tenebræ eam non comprehendenterunt*. Manichæus ergo anathemandus, qui dixit, quia lux tenebrata est in tenebris, et tenebræ eam comprehendenterunt.

FEL. dixit : Sed et qui polluitur, et qui tenetur, liberatur; et nos si polluti sumus, mundamur.

AUG. dixit : Sed hoc de Dei natura non recte dicitur, sed de illa quæ pollui potest, recte dicitur : quia polluitur et mundatur : de illa vero quæ pollui non potest, vides cum quanto sacrilegio dicatur, Polluitur et mundatur; maxime quia sic dicitis quādām Dei partem esse pollutam, ut propterea ligetur in æternum globo tenebrarum, quia non potuit mundari. Ille qui non anathemat, falsum paulo ante respondit, quia omnis qui dicit corruptibilem Deum, anathemandus est.

CAPUT XVI. — FEL. dixit : Hoc quod dixit Sanctitas tua, quia pars quæ se non mundavit ab coquinatione gentis tenebrarum : et sic dicit Manichæus, quia non sunt missi in regnum Dei. Hoc enim asseris tu, quia damnati sunt¹, sed ad custodiā possiti sunt illius gentis tenebrarum.

AUG. dixit : De ista parte tecum ago, quam dicas pollutam purgari : postea si opus fuerit, de illa quæ figitur in globo ejus. Interim quæ purgatur, polluta erat.

FEL. dixit : Quæ polluitur, et mundatur.

AUG. dixit : Qui ergo dicit naturam Dei et substantiam Dei, et id quod Deus est, posse pollui, ligari, inquinari a gente tenebrarum, non est anathemandus?

FEL. dixit : Christus unde nos mundavit? unde nos liberavit?

AUG. dixit : Christus non partem Dei, non naturam Dei liberavit; sed facturam quam fecit, in peccatum cadentem per liberum arbitrium, sua misericordia liberavit. Eam rem mundavit quæ pollui poterat, eam rem liberavit quæ captivari poterat, eam rem sanavit quæ infirmari poterat. Modo autem de Deo, de natura Dei, de substantia Dei, de eo quod Deus est loquimur : poterat pollui, an non poterat?

CAPUT XVII. — FEL. dixit : Anima nostra ex Deo est, quæ polluta est? Si non est ex Deo, vñquid pro illa Christus crucifixus est? Si ergo paret quia Christus propter animam nostram crucifixus est, paret quia ex Deo est, et polluta erat, et ipse eam mundavit.

AUG. dixit : Ego non solum animam, sed et corpus nostrum et omnem creaturam et spiritualem et corporalem ex Deo esse dico : quia hoc habet catholica fides. Sed aliud est quod de se Deus genuit, quod hoc est quod ipse; aliud autem quod fecit Deus. Quod Deus genuit, æquale est Patri : quod Deus fecit, non est æquale conditum conditori. Aliud autem dicimus ex Deo esse, quod melius dicitur de Deo esse, quia

¹ In MSS., sed Manichæus hoc dicit, quia non damnati sunt.

hoc est quod ipse, sicut unigenitus Filius, sicut Verbum ejus per quod facta sunt omnia (*Joan.* 1, 3) : alia vero sic dicimus ex Deo, quia dixit, et facta sunt; mandavit, et constituta sunt (*Psal.* cxlviii, 5). Hinc est anima, ex his quæ fecit Deus, non illud quod de se genuit Deus. Ideo Verbum quod de se genuit, pollici non potuit, nec potest, nec poterit. Anima vero quam fecit rectricem corporis, ut serviret superiori, dominaretur inferiori, id est, serviret Deo, dominaretur corpori, contempta Dei lege per peccatum polluta est; Deus autem misericordiam præstans his quæ fecit, misit Filium per quem fecit, et per illum refecit. Quando condendum erat quod non erat, per Verbum conditum est : quando reficiendum erat quod depravatum fuerat, suscepta est inde creatura de virginie Maria, ut per id quod erat homo, demonstraretur homini et quid sustinendum et quid sperandum esset. Itaque natura Verbi, substantia unigeniti Filii Dei nihil passa est vel a persecutoribus Judæis, vel a diabolo angelo malo persequente. Sed quia induit se carne, induit se re mortali, re passibili, re mutabili, in eo quod se induit, passus est quidquid voluit ad exemplum patientiæ, et reformavit hoc ad exemplum justitiae. Tu modo dic mihi de Dei parte, quod Deus est, utrum pollui possit, an non. Si potest, non est incommutabilis Deus; et qui hoc dicit, anathemandus est : si autem non potest, vides anathemandum esse Manichæum, qui dicit partem Dei, naturam Dei, id quod est Deus, venisse huc puram ad gentem tenebrarum ligatam atque pollutam, ut indigeat solvi ac mundari.

CAPUT XVIII. — FEL. dixit : Hoc tu dixisti de anima, quia ex Deo non est.

AUG. dixit : non dixi; sed dixi quia ex Deo est, tanquam a Deo facta, non tanquam a Deo nata.

FEL. dixit : Dixisti de anima quia non est ex Deo, sed factura Del, quia sine Deo nihil est : hoc enim dicas tu, et non vis asseverare quia ex Deo est anima.

AUG. dixit : a Deo est, sed facta est a Deo.

FEL. dixit : Aut facta, aut missa, aut data, ex Deo est. Ergo si ex Deo est, et polluta est, et venit Christus eam liberare de pollutione; quid culpas Manichæum?

AUG. dixit : Quia ego dico animam non naturam Dei, sed factam a Deo, per liberum arbitrium peccasse, et peccato esse pollutam, et per Dei misericordiam in poenitentia liberatam : tu autem ipsam naturam Dei, quod Deus est, Deum de Deo dicis in gente tenebrarum captum atque pollutum : et multum interest inter id quod de se Deus genuit, et quod fecit non de se, sed ex nihilo, id est, cum omnino non esset, a Deo accepit ut esset, id est, ut institueretur.

FEL. dixit : Ergo pars Dei est.

AUG. dixit : Jam tibi dictum est, non est pars Dei : et accipe quomodo intelligas Deum omnipotentem factorem. Omnia quæ sunt, et quod quisque facit, aut de se est, aut ex aliquo, aut ex nihilo. Homo quia non est omnipotens, de se filium facit : ex aliquo, sicut artifex

ex ligno arcum, ex argento vasculum. Potuit enim facere vasculum, sed non potuit facere argentum : potuit facere arcum, sed non potuit facere lignum. Ex nihilo autem, ex eo quod prorsus non est facere ut sit, nullus hominum potest. Deus autem quia omnipotens est, et de se Filium genuit, et ex nihilo mundum fecit, et ex limo hominem formavit : ut per istas tres potentias ostenderet affectionem suam in omnibus valenteam. Qui de se quod fecit, nec fecisse dicendus est, sed genuisse. Quod autem ex aliquo, sicut de terra hominem, non sic fecit hominem de terra, ut aliud ei fecerit ipsam terram unde ficeret hominem, quomodo fecit Deus argentum argentario unde ficeret vasculum : sed ipse fecit, et quod non erat ut esset, et quod inde rursus esset, quod jam ipse ex nihilo creaverat ut esset. Sic ergo corpus, sic anima, sic intelligitur universa creatura facta a Deo ; non genita de Deo, ut hoc sit quod Deus. Proinde modo forte eliges quid teneas, et quid respicias. Elige quid sit melius. Quoniam videmus multa mutabilia, et ipsa tamen bona, quamvis mutabilia ; multa mortalia, et ipsa tamen bona, quamvis mortalia : bonum autem omnino immutabile ipse Deus est : quid melius sit tibi tenere, elige ; Deum mutabilem esse, an quod fecit Deus mutabile esse? Quia necesse est ut unum de duobus diccas. Si nolueris admittere id quod fecit Deus esse immutabile, restat ut dicas ipsum Deum esse mutabilem. Ut autem ab hoc sacrilegio te purges, et ab hac blasphemia, ne dicas substantiam Dei esse mutabilem ; quare non concedis Deum qui vere est, et incommutabilis est, quia ipse etiam dixit, *Ego sum qui sum* (*Exod.* iii, 14), fecisse omnia bona, sed non sibi paria? Proinde quia ipse incommutabilis est, non est mirum si quod fecit, quia ei æquale non est, non est incommutabile, sed mutabile. Ideo et per liberum arbitrium peccare et pollui potuit, et per ejus misericordiam liberari.

CAPUT XIX. — FEL. dixit : Dixisti hominem fecisse sibi filium : nihil interest inter patrem et filium. Quia hoc ergo protulit Sanctitas tua, et ego respondeo quia Deus et quæ facit, æqualia sunt sibi.

AUG. dixit : Quod intelligere noluisti, quia homo cum filium facit, non facere proprio dicitur, sed proprio generare dicitur : sic et Deus Filium unicum genuit, dixi tibi, non fecit. Fecit autem illud quod æquale ei non est : quod autem genuit, æquale illi est. Itaque elige tibi, utrum velis dicere immutabilem Dei facturam, an mutabilem Dei naturam.

FEL. dixit : Quomodo Deus immutabilis est, similiter quem genuit, immutabilis est ; et quod fecit, si de ipsis natura est, non mutatur (sed de nihilo fecit, quia opus non mutatur¹).

AUG. dixit : Sed jam tibi dictum est quia quod fecit, non de ipsis natura est ; sed ex nihilo fecit, quia omnipotens est. Non erat, et fecit, non de se,

¹ Ep. Lugd. Ven. Lov., qm̄ia.

² Id parenthesis inclusum abest a nostris vss.

non de aliqua re quam ipse non fecerat, sed ex nihilo.

FEL. dixit : Ego non hoc dixi : sed dixi, quia Deus immutabilis est, et quod genuit immutable est, et quod fecit immutabile est. Non dixi, unde illud fecit : non hoc quæsivi, unde fecerit.

Auc. dixit : Sed a me audisti quod non quæsisti, ut jam desineres stulta loqui. Omnipotens Deus et de se potuit generare, et de nihilo facere, et ex eo quod jam fecerat, aliquid formare : de se, Filium æqualem sibi ; de nihilo, mundum et universam creaturam ; ex aliquo, de terra hominem : quia omnipotens est. Quod ergo de se ipso est, pollui nunquam potest, quomodo nec ipse : quod autem ab illo factum est, non de illo, et pollui potest per liberum arbitrium, et mundari per ipsius misericordiam, condemnando quod peccavit, et agnoscendo qui eum creavit. Tu vero qui paupero ante dixisti quia qui Dei partem corruptibilem et contaminabilem dicit, anathemandus es, negare autem non potes. Manichæum dixisse quod pars Dei in gente tenebrarum comprehensa atque polluta est, et his eum verbis blasphemasse appetet, ita ut pejus blasphemare forte non posset ; aut anathema illum talia dicentem, aut tu cum illo anathemandus es et abjiciendus.

CAPUT XX. — **FEL.** dixit : Manichæus dicit quia polluta est pars Dei ; et Christus dicit quia polluta est anima, et venit liberare illam de pollutione.

Auc. dixit : Sed anima non est pars Dei. Nam jam tu confessus es quia Manichæus dixit pollutam partem Dei : nos autem pollutam dicimus animam ex voluntate peccati ; non esse autem animam partem Dei, non de Deo genitam, sed a Deo factam. Sic ergo dicitur anima ex Deo, quomodo dicitur aliquid opus subiecti ex artificio ejus, vel ex ipso factum, non tamen de ipso genitum, sicut filius ejus. Tu ergo quia jam confessus es Manichæum dixisse pollui partem Dei, et jamdudum dixisti anathemandum qui dicit corruptibilem vel contaminabilem Deum, vel naturam ejus ; jam anathemasti, quod non vis fateri. Hoc enim quod dixisti, quia polluitur et quia mundatur, hoc ipsum quod dicas. Mundatur, expressisti quia polluitur ; et non habes unde evadas : et Manichæus¹, et tu dixisti quia polluitur pars Dei. Anathema ergo Manichæum, aut anathemandus es cum Manichæo.

FEL. dixit : Ego non a Manichæo didici quia polluta est pars Dei ; sed a Christo didici quia propter animam venit quæ polluta erat.

Auc. dixit : A Christo non didicisti quia anima pars Dei est.

FEL. dixit : A Christo didici quia anima ex Deo est.

Auc. dixit : Et nos didicimus quia anima ex Deo est, sed non est pars Dei. Sic est enim anima ex Deo, quomodo factura ex artifice ; non de Deo, sicut filius de patre.

¹ Et Ingd. et ven., unde evadat Manichæus. Lov., evadat, abeat, et Manichæus. M.

FEL. dixit : De pollutione agimus : si polluta est anima quæ ex Deo est, et potest purgari a Christo, qui pro illa venit ; et illa pars Dei quam Manichæus dicit, pollui potest et mundari per mandatum ipsius Dei.

Auc. dixit : Ecce iterum dicis partem Dei pollutam purgari, et paulo ante dixeras anathemandum esse qui illam dicit corruptibilem : modo dicis quia pollui potuit ; et dicis quia mundari potest, ut confimes quia pollui potuit. Hoc nos de parte Dei non dicimus : sed de anima dicimus ; quia tanquam opus ejus ex ipso est, non tanquam proles de ipso. Redi ergo ad id quod dicis, et discerne quod dicimus. Anima nec Deus est, nec pars Dei. Tu autem Manichæum dicis dixisse pollui partem Dei, quam dicit purgari, ut confimes quia polluitur. Restat ergo ut eum anathemes, aut ista sentiens anathemeris.

CAPUT XXI. — **FEL.** dixit : Pertinet ad Deum anima quæ per peccatum coquinata est, an non ?

Auc. dixit : Pertinet, sed non est pars ejus.

FEL. dixit : Non hoc interrogavi.

Auc. dixit : Et quid interrogasti ?

FEL. dixit : Pertinet ad Deum, an non pertinet ?

Auc. dixit : Jam dixi, et quia pertinet, et quomodo pertinet.

FEL. dixit : Ego quero utrum vere est ex Deo.

Auc. dixit : Ex Deo, non de Deo.

FEL. dixit : Si nihil peccatum est, et anima ex Deo est, et polluta est, et venit Christus liberare eam, et eam liberavit a peccato, quid culpamus Manichæum, qui dicit partem Dei pollutam esse, et iterum mundari ?

Auc. dixit : Quia jam confessus es Manichæum dixisse partem Dei esse pollutam, et dicis non esse peccatum talēm blasphemiam in Deum effundere : nos autem dicimus quidem peccasse animam per liberum arbitrium, et penitendo purgari per misericordiam Creatoris sui ; quia non est ex Deo tanquam pars ejus, vel tanquam proles ejus ; sed ex Deo vel a Deo facta est, tanquam opus ejus : quid intersit inter nostram fidem et vestram perfidiam, omnibus manifestum est. Itaque secundum verba tua superiora, quia concessisti anathemandum eum qui dicit corruptibilem naturam Dei, quod et Manichæum dicere manifestum est, quia noluisti ut esset a te anathematus, eris cum illo anathematus.

CAPUT XXII. — Post hæc cum multis verbis inter se agerent :

FEL. dixit : Dic jam tu, quid vis faciam ?

Auc. dixit : Ut anathemes Manichæum, cuius sunt tantæ istæ blasphemiae. Sed si ex animo facis, tunc fac ; nemo enim te cogit invitum.

FEL. dixit : Deus videt si ex animo facio ; non enim homo potest videre : sed hoc peto, ut confimes me.

Auc. dixit : In quo vis ut te confirmem ?

FEL. dixit : Prior tu anathema, ut et ego postea anathemem.

Auc. dixit : Ecce etiam manu mea scribo ; vole eam ut et tu manu tua scribas.

FEL. dixit : Sed sic anathemo, ut spiritum ipsum qui in Manichæo fuit, et per eum ista locutus est, anathemes.

Augustinus accepta charta scripsit hæc verba : Augustinus episcopus Ecclesiæ catholicæ jam anathemavi Manichæum et doctrinam ejus, et spiritum qui per eum tam execrabilis blasphemias locutus est, quia spiritus seductor erat, non veritatis, sed nefandi erroris; et nunc anathemo supra dictum Manichæum et spiritum erroris ipsius.

Et cum eamdem chartam Felici dedisset, etiam ille manu sua hæc verba scripsit : Ego Felix qui Mani-

chæo credideram, nunc anathemo eum, et doctrinam ipsius, et spiritum seductorem qui in illo fuit, qui dixit Deum partem suam genti tenebrarum miscuisse, et eam tam turpiter liberare, ut virtutes suas transfiguraret in feminas contra masculina, et ipsas iterum in masculos contra feminina dæmonia, ita ut postea reliquias ipsius suæ partis configat in æternum glore tenebrarum. Has omnes et cæteras blasphemias Manichæi anathemo.

Augustinus episcopus, his in ecclesia coram populo Gestis subscrispi.

Felix his Gestis subscrispi.

IN OPUSCULUM SUBSEQUENS,

Vide lib. 2, cap. 9, Retractionum, tom. 1, col. 634, a verbis, Liber de Natura Boni, usque ad verba, Deus est M.

S. AURELII AUGUSTINI HIPPONENSIS EPISCOPI DE NATURA BONI CONTRA MANICHÆOS

Liber unus^(a).

CAPUT PRIMUM. — Deus summum bonum et incom-mutable, a quo cætera omnia bona spiritualia et corporalia. Summum bonum quo superius non est, Deus est : ac per hoc incommutabile bonum est ; ideo vere æternum, et vere immortale. Cætera omnia bona non nisi ab illo sunt, sed non de illo. De illo enim quod est, hoc quod ipse est : ab illo autem quæ facta sunt, non sunt quod ipse. Ac per hoc si solus ipse incommutabilis, omnia quæ fecit, quia ex nihilo fecit, mutabilia sunt. Tam enim omnipotens est, ut possit etiam de nihilo, id est, ex eo quod omnino non est, bona facere, et magna et parva, et celestia et terrena, et spiritualia et corporalia. Quia vero et justus est, ei quod de se genuit, ea quæ de nihilo fecit, non æquavit. Quia ergo bona omnia, sive magna sive parva, per quoslibet rerum gradus, non possunt esse nisi a Deo ; omnis autem natura in quantum natura est, bonum est ; omnis natura non potest esse nisi a summo et vero Deo : quia omnia etiam non summa

bona, sed propinqua summo bono, et rursus omnia etiam novissima bona, qua longe sunt a summo bono, non possunt esse nisi ab ipso summo bono. Omnis ergo spiritus etiam mutabilis, et omne corpus a Deo : et hæc est omnis facta natura¹. Omnis quippe natura aut spiritus, aut corpus est. Spiritus incommutabilis Deus est : spiritus mutabilis facta natura est, sed corpore melior : corpus autem spiritus non est, nisi cum ventus, quia nobis invisibilis est, et tamen vis ejus non parva sentitur, alio quodam modo spiritus dicitur.

CAPUT II. — Quomodo id possit ad corrigendos Manichæos sufficere. Propter eos autem, qui cum intelligere non possunt omnam naturam, id est, omnem spiritum et omne corpus naturaliter bonum esse, moventur spiritus iniquitate et corporis mortalitate, et ob hoc aliam naturam maligui spiritus et mortalis corporis, quam Deus non fecerit, conantur inducere : sic arbitramur ad eorum intellectum, quod dicimus

ADMOTIO PP. BENEDICTINORUM.

Liber de Natura Boni recognitus est ad veteres codices quatuor Vaticanos, Gallicanos novem, Victorinum, Sorbonicum, Corbeiensem, Fossatensem, Cisterciensem, Casalensem, Bigotianum, Laudunensem majoris Ecclesiæ, ad unum Augustinensem majoris conventus Parisiensis, ad variantes lectiones ex Belgicis codicibus descriptas per Lovanienses, et ad editiones Ann. Br. et Lov.

Comparavimus præterea eas omnes editiones initio Retr. et Confess., t. 1, memoratas. M.

(a) Scriptus post annum 404. Collocatur in Retractionibus proxime post libros de Actis cum Felice, qui sub finem anni 404 conscripti sunt.

¹ Er. Lugd. et Ven., et hoc est omnis. Lov., et hæc omnia. M.